



行
水
金
鑑

百百
五一

ル 5
1174
12



凡 5
1174
卷 12



行水金鑑

卷第一百一

中憲大夫分巡淮揚等處地方兼理漕務海防河道鹽課屯田事務南提刑按察使司使臣卞景衡撰

運河水

金口河 至正二年正月中書參議字羅帖木兒都水
傅佐建言起自通州南高麗莊直至西山石峽鐵板開
水古金口一百二十餘里創開新河一道深五丈廣二
十丈放西山金口水東流至高麗莊合御河接引海運
至大都城內輸納是時脫脫為中書右丞相以其言奏
而行之廷臣多言其不可而左丞許有壬言尤力脫脫
排羣議不納務於必行有壬因條陳其利害略曰大德

二年渾河水發爲民害大都路都水監將金口下閉閘
板五年間渾河水勢浩大郭太史恐衝沒田薛二村南
北二城又將金口已上河身用砂石雜土盡行堵閉至
順元年因行都水監郭道壽言金口引水過京城至通
州其利無窮工部官并河道提舉司大都路及合屬官
員耆老等相視議擬水由二城中間窒礙又盧溝河自
橋至合流處自來未嘗有漁舟上下此乃不可行船之
明驗也且通州去京城四十里盧溝止二十里此時若
可行船當時何不於盧溝立馬頭百事近便却於四十
里外通州爲之又西山水勢高峻亡金時在都城之北
流入郊野縱有衝決爲害亦輕今則在都城西南與昔

不同此水性本湍急若加以夏秋霖潦漲溢則不敢必
其無虞宗廟社稷之所在豈容僥倖於萬一若一時成
功亦不能保其永無衝決之患且亡金時此河未必通
行今所有河道遺跡安知非作而復輟之地乎又地形
高下不同若不作閘必致走水淺澀若作閘以節之則
沙泥渾濁必致淤塞每年每月專人挑洗蓋無窮盡之
時也且郭太史初作通惠河時何不用此水而遠取白
浮之水引入都城以供閘具之用蓋白浮之水澄清而
此水渾濁不可用也此議方興傳聞於外萬口一辭以
爲不可若以爲成大功者不謀於衆人言不足聽則是
商鞅王安石之法當今不宜有此議既上丞相終不從

行水金鑑卷一百一
遂以正月興工至四月功畢起閘放金口水流湍勢急
沙泥壅塞船不可行而開挑之際毀民廬舍墳塋夫丁
死傷甚衆又費用不貲卒以無功繼而御史糾劾建言
者孛羅帖木兒傳佐俱伏誅今附載其事於此用爲妄
言水利者之戒

元史河渠志

灤河源出金蓮川中由松亭北經遷安東平州西瀕灤
州入海也王曾北行錄云自偏槍嶺四十里過烏灤河
東有灤州因河爲名至元二十八年八月省臣奏姚演
言奉敕疏浚灤河漕運上都乞應副沿河蓋露困工匠
什物仍預備來歲所用漕船五百艘水手一萬牽船夫
二萬四千臣等集議近歲東南荒歉民力凋弊造舟調

夫其事非輕一時並行必致重困請先造舟十艘量撥
水手試行之如果便續增益制可其奏先以五十艘行
之仍選能人同事大德五年八月十三日平灤路言六
月九日霖雨至十五日夜灤河與淝淝三河並溢衝圮
城東西二處舊護城隄東西南三面城牆橫流入城漂
郭外三關瀕河及在城官民屋廬糧物沒田苗溺人畜
死者甚衆而雨猶不止至二十四日夜灤漆淝淝諸河
水復漲入城餘屋漂蕩殆盡乃委吏部馬員外同都水
監官修之東西二隄計用工三十六萬一千五十鈔八
千八十七錠十五兩糙粳米三千一百一十石五斗椿
木等價鈔二百七十四錠二十六兩四錢延祐四年六

行水金鑑卷一百一
三
月十六日上都留守司言正月一日城南御河西北岸
為水衝嚙漸至頽圯若不修治恐來春水泛漲漂沒民
居又開平縣言四月二十六日霖雨至二十八日夜東
關灤河水漲衝損北岸宜擬修築本司議即自仲夏霖
雨其水復溢必大為害乃委官督夫匠興役開平發民
夫幼小不任役請調軍供作庶可速成五月二十一日
留守司言灤河水漲決隄計修築用軍六百宜令樞密
院差調官給其食制曰今維其時移文樞密院發軍速
為之虎賁司發軍三百治焉泰定二年三月十三日永
平路屯田總管府言國家經費咸出於民民之所生無
過農作本屯闢田收糧以供億內府之用不為不重訪

馬城東北五里許張家莊龍灣頭在昔有司差夫築隄
以防灤水西南連清水河至公安橋皆本屯地分去歲
霖雨水溢衝盪皆盡浸死屯民田苗終歲無收方今農
隙若不預修必致為害工部移文都水監差濠寨泊本
屯官及灤州官親詣相視督令有司差夫補築三年五
月十日上都留守司及本路總管府言巡視大西關南
馬市口灤河遞北隄侵嚙漸崩不預治恐夏霖雨水泛
貽害居民於是送都城所丈量計用物修治工部移文
上都分部施行七月二日右丞相塔失帖木兒等奏幹
耳朶思住冬營盤為灤河走凌河水衝壞將築護水隄
宜令樞密院發軍千二百人以供役從之樞密院請遣

軍千二百人

元史河渠志 畿輔通志灤河源自口北開平東南流經遷安縣界至盧龍縣合漆河又南至樂亭縣入海

河間河在河間路界泰定三年三月都水監言河間路水患古儉河自北門外始依舊疏通至大成縣界以洩上源水勢引入鹽河古陳玉帶河自軍司口浚治至雄州歸信縣界以導淀灤積潦注之易河黃龍港自鎖井口開鑿至文安縣玳瑁口以通灤水經火燒淀轉流入海計河宜疏者三十處總役三萬三十日可畢是月省臣奏準遣斷事官定住同元委都水孫監丞洎本處有司官於旁近州縣發丁夫三萬日給鈔一兩米一升先詣古陳玉帶河尋以歲旱民饑役興人勞罷候年登爲之

冶河在真定路平山縣西門外經井陘縣流來本縣東北十里入滹沱河元貞元年正月十八日丞相完澤等言往年先帝嘗命開真定冶河已發丁夫人役適值先帝昇遐以聚衆罷之今請遵舊制俾卒其事從之皇慶元年七月二日真定路言龍花判官莊諸處壞隄計工物申請省委都水監及本路官自平山縣西北歷視滹沱冶河合流急注真定西南關由是再議照冶河故道自平山縣西北河內改修滾水石隄下修龍塘隄東南至水碾村改引河道一里蒲吾橋西改闢河道一里上至平山縣西北下至寧晉縣疏其淤澱築隄分其上源入舊河以殺其勢復有程同程章二石橋阻咽水勢擬

開減水月河二道可久且便下相藥城縣南視趙州寧
晉縣諸河北之下源地形低下恐水泛經藥城趙州壞
石橋阻河流為害由是議於藥城縣北聖母堂東冶河
東岸開減水河可去真定之患省準於二年二月都水
監委官與本路及廉訪司官同詣平山縣相視會計修
治總計冶河始自平山縣北關西龍神廟北獨石通長
五千八百六步共役夫五千為工十八萬八百七無風
雨妨工三十六日可畢

元史河渠志 畿輔通志冶河在藥城縣西北
自滹沱河分而東流於城側南入於大陸澤相
傳為漢大白渠宋金
間供陶冶之用故名

滹沱河源出於西山在真定路真定縣南一里經藁城
縣北一里經平山縣北十里寰宇記載經靈壽縣西南

二十里此河連貫真定諸郡經流去處皆曰滹沱水也
延祐七年十一月真定路言真定縣城南滹沱河北決
隄寢近城每歲修築聞其源本微與冶河不相通後二
水合其勢遂猛屢壞金大隄為患本路達魯花赤哈散
於至元三十年言準引闢冶河自作一流滹沱河水十
退三四至大元年七月水漂南關百餘家淤塞冶河口
其水復滹河自後歲有潰決之患略舉大德十年至皇
慶元年節次修隄用捲埽葦草二百餘萬官給夫糧備
傭直百餘萬錠及延祐元年三月至五月修隄二百七
十餘步其明堂判官勉村三處就用橋木為椿徵夫五
百餘人執役月餘不能畢近年米價翔貴民匱於食有

行州金鑑卷一百一
六
丁者正身應役單丁者必須募人人曰傭直不下三五貫前工未畢後役迭至至七月八日又衝塌李玉飛等莊及木方胡營等村三處隄長一千二百四十步申請委官相視差夫築月隄延祐二年本路前總管馬思忽嘗闢冶河已復湮塞今歲霖雨水溢北岸數處浸沒田禾其河元經康家莊村南流不記歲月徙於村北數年修築皆於隄北取土故南高北低水愈就下侵嚙西至木方村東至護城隄數約二千餘步比來春必須修治用椿梢築土隄亦非永久之計若濬木方村南舊湮枯河引水南流插閉北岸河口於南岸取土築隄下至合頭村北與本河合如此去城稍遠庶可無患都水監差

官相視截河築隄闊千餘步新開古岸北闊六十步恐不能制禦千步之勢若於北岸闕破低薄處比元料增夫力葦草捲埽補築便計葦草丁夫若合責辦民間緣今歲旱澇相仍民食匱乏擬均料各州縣上中戶價錢及食米於官錢內支給限二月二十日興工役夫五千爲工十六萬七百一十九度三十二日可畢總計補築滹沱河北岸防水隄十處長一千九百一十步高闊不一計三百四十萬七千七百五十尺用推埽梯二十五每梯用大橛三小橛三計大小橛一百五十草三十五萬八百束葦二十八萬六百四十束梢柴七千二百束至治元年三月真定路言真定將滹沱河每遇水泛衝

隄岸浸沒民田已差募丁夫修築與廉訪司官相視講究如將木方村南舊堙河道疏闊導水東南行牐閉北岸却於河南取土修築至合頭村合入本河似望可以民安都水監與真定路官相視議夫治水者行其所無事蓋以順其性也牐閉滹沱河口截河築隄一千餘步開掘故河老岸闊六十步長三十餘里改水東南行流霖雨之時水拍兩岸截河隄堰阻逆水性新開故河止闊六十步焉能吞受千步之勢上嚙下滯必致潰決徒糜官錢空勞民力若順其自然將河北岸舊隄比之元料增添工物如法捲埽堅固修築誠爲官民便益省準補築滹沱河北岸縷水隄一十處通長一千九百一十

步役夫五百名計一十六萬七百三十九工泰定四年八月七日省臣奏真定路言滹沱河水連年泛溢爲害都水監廉訪司真定路及瀕河州縣官洎耆老會議其源自五臺諸山來至平山縣玉母村山口下與平定州娘子廟石泉治河合夏秋霖雨水漲瀾漫城郭每年勞民築隄莫能除害宜自王子村新安村鑿河長四里餘接魯家灣舊澗復開二百餘步合入冶河以分殺其勢又木方村滹沱河南岸故道疏滌三十里北岸下椿捲埽築隄捍水令東流今歲儲材九月興役期十一月功成所用石鐵石灰諸物夫匠工糧官爲供給力省功多可永無害工部議若從所請二河並治役大民勞擬先

開治河其真定路徵民夫如不敷可於鄰郡順德路差募人夫日給中統鈔一兩五錢如侵礙民田官酬其直中書省都水監差官率知水利濠寨督本路及當該州縣用工廉訪司添力咸就滹河近後再議從之九月委都水監官洎本道廉訪司真定路同監督有司併工修治後真定路言閏九月五日為始興工間據趙州臨城諸縣申天寒地凍難於用工候春暖開闢便已於十月七日放散人民部議人夫既散宜準所擬凡已給夫鈔二萬六千八百三十二錠地價錢六百三十錠

元史河渠志畿輔

通志云滹沱河在真定府城南班固敘禹貢所謂徒駭者是也發源於山西繁峙經雁門由靈壽平山抵府城南順流而東歷葉城晉州衡水深州武強武邑入直沽而達於海每夏暴雨壞決隄防甚為民害

會通河起東昌路須城縣安山之西南由壽張西北至東昌又西北至於臨清以達於御河至元二十六年壽張縣尹韓仲暉太史院令史邊源相繼建言開河置牐引汶水達舟於御河以便公私漕販省遣漕副馬之貞與源等按視地勢商度工用於是圖上可開之狀詔出楮幣一百五十萬緡米四萬石鹽五萬斤以為備直備器用徵旁郡丁夫三萬驛遣斷事官忙速兒禮部尚書張孔孫兵部尚書李處巽等董其役首事於是年正月己亥起於須城安山之西南止於臨清之御河其長二百五十餘里中建牐三十有一度高低分遠邇以節蓄洩六月辛亥成凡役工二百五十一萬七百四十有八

行水金鑑卷一百一
六
賜名曰會通河二十七年省以馬之貞言霖兩岸崩河道淤淺宜加修浚奏撥放罷輸運站戶三千專供其役仍俾采伐木石等以充用是後歲委都水監官一員佩分監印率令史奏差濠寨官往職巡視且督工易牘以召而視所損緩急爲後先至泰定二年始克畢事會通鎮牘三土壩二在臨清縣北頭牘長一百尺闊八十尺兩直身各長四十尺兩鴈翅各斜長三十尺高二尺牘空闊二丈自至元三十年正月一日興工凡役夫匠六百六十名至十月二十九日工畢中牘南至隘船牘三里元貞二年七月二十三日興工至大德二年三月十三日工畢夫匠四百四十三長廣與上牘同隘船南至

李海務牘一百五十二里延祐元年八月十五日興工九月二十五日工畢夫匠五百牘空闊九尺長廣同上土壩二李海務牘南至周家店牘一十二里元貞二年二月二日興工五月二十日工畢夫匠五百二十七名長廣與會通鎮牘同周家店牘南至七級牘一十二里大德四年正月二十一日興工八月二十日工畢夫匠四百四十二長廣與上同七級牘二北牘南至南牘三里大德元年五月一日興工十月六日工畢夫匠四百四十三名長廣如周家店牘南牘南至阿城牘一十二里元貞二年正月二十日興工十月五日工畢夫匠四百五十名長廣同北牘阿城牘二北牘南至南牘三里

行水金鑑卷一百一
大德三年三月五日興工七月二十八日工畢夫匠四百四十一名長廣上同南牆南至荆門北牆一十里大德二年正月二十五日興工十月一日工畢夫匠四百四十六名長廣上同荆門牆二北牆南至荆門南牆二里半大德三年六月初一日興工至十月二十五日工畢役夫三百一十名長廣同南牆南至壽張牆六十三里大德六年正月二十三日興工六月二十九日工畢長廣同北牆壽張牆南至安山牆八里至元三十一年正月一日興工五月二十日工畢安山牆南至開河牆八十五里至元二十六年建開河牆南至濟州牆一百二十四里濟州牆三上牆南至中牆三里大德元年三

月十二日興工七月二十八日工畢中牆南至下牆二里至治元年三月一日興工六月六日工畢下牆南至趙村牆六里大德七年二月十三日興工五月二十一日工畢趙村牆南至石佛牆七里泰定四年二月十八日興工五月二十日工畢石佛牆南至辛店牆一十三里延祐六年二月十日興工四月二十九日工畢辛店牆南至師家店牆二十四里大德元年正月二十七日興工四月一日工畢師家店牆南至棗林牆一十五里大德二年二月三日興工五月二十三日工畢棗林牆南至孟陽泊牆九十五里延祐五年二月四日興工五月二十二日工畢孟陽泊牆南至金溝牆九十里大德

八年正月四日興工五月十七日工畢金溝牐南至隘
船牐一十二里大德十年閏正月二十五日興工四月
二十日工畢沽頭牐二北隘船牐南至下牐二里延祐
二年二月六日興工五月十五日工畢南牐南至徐州
一百二十里大德十一年二月興工五月十四日工畢
三汊口牐入鹽河南至土山牐一十八里泰定二年正
月十九日興工四月十三日工畢土山牐南至三汊口
牐二十五里入鹽河兗州牐岡城牐延祐元年二月二
十日省臣言江南行省起運諸物皆由會通河以達於
都爲其河淺澀大船充塞於其中阻礙餘船不得來往
每歲省臺差人巡視其所差官言始開河時止許行百

五十料船近年權勢之人并富商大賈貪嗜貨利造三
四百料或五百料船於此河行駕以致阻滯官民舟楫
如於沽頭置小石牐一止許行百五十料船便臣等議
宜依所言中書及都水監差官於沽頭置小牐一及於
臨清相視宜置牐處亦置小牐一禁約二百料之上船
不許入河行運從之至治三年四月十日都水分監言
會通河沛縣東金溝沽頭諸處地形高峻旱則水淺舟
澀省部已準置二滾水堰近延祐二年沽頭牐上增置
隘牐一以限巨舟每經霖雨則三牐月河截河土堰盡
爲衝決自秋摘夫刈薪至冬水落或來歲春首修治工
夫浩太動用丁夫千百束薪十萬之餘數月方完勞費

行水金鑑卷一百一
萬倍又况延祐六年雨多水溢月河土堰及石牯鴈翅
日被衝嚙土石相離深及數丈其工倍多至今未完今
若運金溝沽頭并隘牯三處見有石於沽頭月河內修
堰牯一所更將隘牯移置金溝牯月河或沽頭牯月河
內水大則大牯俱開使水得通流小則閉金溝大牯上
開隘牯沽頭則閉隘牯而啓正牯行舟如此歲省修治
之費亦可免丁夫冬寒入水之苦誠爲一勞永逸移文
工部令委官與有司同議於是差濠寨約會濟寧路官
相視就問金溝牯提領周德興言每歲夏秋霖雨衝失
牯隄必候水落役夫采薪修治不下三兩月方畢冬寒
水作苦不勝言會驗監察御史言延祐初元省臣亦嘗

請置隘牯以限巨舟臣等議其言當請從之於是議梭
板等船乃御河江淮可行之物宜遣出任其所之於金
溝沽頭兩牯中置隘牯二各闊一丈以限大船若欲於
通惠會通河行運者止許一百五十料違者罪之仍沒
其船其大都江南權勢紅頭花船一體不許來往準擬
折移沽頭隘牯置於金溝大牯之南仍作連環牯其間
空地北作滾水石堰水漲即開大小三牯水落即鎖閉
大牯止於隘牯通舟果有小料船及官用巨物許申稟
上司權開大牯仍添金溝牯板積水以便行舟其沽頭
截河土堰依例改修石堰盡除舊有土堰三道金溝牯
月河內砌建滾水石堰長一百七十尺高一丈闊一丈

行水金鑑卷一百一
沽頭牐月河內修截河堰長一百八十尺高一丈一尺
底闊二丈上闊一丈泰定四年四月御史臺臣言巡視
河道自通州至真揚會集都水分監及瀕河州縣官民
詢考利病不出兩端一曰壅決二曰經行卑職叅詳自
古立國引漕皆有成式自世祖屈羣策濟萬民疏河渠
引清濟汶泗立牐節水以通燕薊江淮舟楫萬里振古
所無後人篤守成規苟能舉其廢墜而已實萬世無窮
之利也蓋水性流變不常久廢不修舊規漸壞雖有智
者不能善後以故詳歷考視酌古準今叅會衆議輒有
管見倘蒙采錄責任水監謹守勿失能事畢矣不窮利
病之源頻歲差人具文巡視徒為煩擾無益於事都水

監元立南北隘牐各闊九尺二百料下船梁頭八尺五
寸可以入牐愚民嗜利無厭為隘牐所限改造減舷添
倉長船至八九十尺甚至百尺皆五六百料入至牐內
不能回轉動輒淺閣阻礙餘舟蓋緣隘牐之法不能限
其長短今卑職至真州問得造船作頭稱過閘船梁八
尺五寸船該長六丈五尺計二百料由是叅詳宜於隘
牐下岸立石則遇船入牐必須驗量長不過則然後放
入違者罪之牐內舊有長船立限遣出省下都水監委
濠寨官約會濟寧路委官同歷視議擬隘牐下約八十
步河北立二石則中間相離六十五尺如舟至彼驗量
如式方許入牐有長者罪遣退之又與東昌路官親詣

議擬於元立隘牐西約一里依已定丈尺置石則驗量
行舟有不依元料者罪之天曆三年三月詔諭中外都
水監言世祖費國家財用開闢會通河以通漕運往來
使臣下番百姓及隨從使臣各枝幹脫權勢之人到牐
不候水則恃勢捶撻看牐人等頻頻起放又漕運糧船
凡遇水淺於河內築土壩積水以漸行舟以故壞牐乞
禁治事命後諸王駙馬各枝往來使臣及幹脫權勢之
人下番使臣等并運官糧船如到牐依舊定例啓閉若
似前不候水則恃勢捶拷守牐人等勒令啓牐及河內
用土築壩壞牐之人治其罪如守牐之人恃有聖旨合
啓牐時故意遲延阻滯使臣客旅欺要錢物乃不畏常

憲也仍令監察御史廉訪司常加體察

元史河渠志

楊文郁開會通河功成之碑云聖神文武大光孝皇
帝在位之十七年江南平薄海內外罔不拱北臣順
奔走率職汶合泗分流以達東阿乃置汶泗都漕運
使司控引江淮嶺海以供億京師自東阿至臨清二
百里舍舟而陸車輸至御河徒民一萬三千二百七
十六戶除租庸調奈道經荏平其間地勢卑下遇夏
秋霖潦牛僮輟脫艱阻萬狀或使驛旁午貢獻相望
負戴底滯晦暝呼驚行居騷然公私以為病久矣壽
張縣尹韓仲暉前太史邊源相繼建言汶水屬之御
河北陸運利相十百詔以都漕運副使馬之貞同源

按視之貞等至則循行地形商度功用叅之衆議圖
上可開狀上俞允賜中統楮幣一百五十萬緡米四
萬石鹽五萬斤以給備直備器用徵傍近郡丁夫三
萬驛遣斷事官忙速兒禮部尚書張孔孫兵部尚書
李處吳泊之貞源同主其役二十六年正月己亥首
事起須城安山之西南壽張西北行過東昌又西北
至臨清達御河長二百五十餘里吏謹督程人悉致
力渠尋畢功益加浚治以六月辛亥決汶流以趨之
滔滔汨汨傾注順適如復故道舟楫連檣而下仍起
堰牖以節蓄洩完隄防以備盪激凡用工二百五十
一萬七百四十有八濱渠之民老幼攜扶喜見泛舟

之役於是大駕臨幸上都驛置以聞上詔翰林院其
為運河命名且文其碑臣等乞賜名會通百拜稽首
屬辭曰謹按書以食貨為八政之首易稱舟楫有濟
川之利故大舜命禹既平水土定九州之貢賦皆浮
舟達河以入冀都自茲以降漢用鄭當時之言引渭
至河以利西都唐用劉晏之策由汴入河以濟關輔
蓋京師者四方輻輳兆姓雲集六師所依以彊百司
所資以辦不豐儲積政將奚先我國家新天邑於析
木之津建萬億年無疆之業規模宏遠治具周密若
夫漕運流通國之大計舟車致遠功利懸絕所宜講
而行之雖費而不可省勞而不可已者今則費取於

官利及於民役不逾時功垂後世加以隨時豐歉權
事重輕致國殷富由此途出臣備屬北門職在紀事
仰奉明詔以識歲月至若神功聖德上下與天地同
流蓋非纂河渠溝洫者所能彷彿也

山東全河備考

卷第一百一

此處為書中內容，因字跡模糊，難以辨認。

行水金鑑

卷第一百二

運河水

兗州牘已見前至元二十七年四月都漕運副使馬之
貞言准山東東西道宣慰使司牒文相視兗州牘堰事
先於至元十二年蒙丞相伯顏訪問自江淮達大都河
道之貞乃言宋金以來汶泗相通河道郭都水按視可
以通漕於二十年中書省奏准委兵部李尚書等開鑿
擬修石牘十四二十一年省委之貞與尚監察等同相
視擬修石牘八石堰二除已修畢外有石牘一石堰一
垆城石堰一至今未修據濟州以南徐邳沿河擇道橋
梁二十二年添立邳州水站移文沿河州縣修治已完

二十三年調之貞充漕運副使委管牘接放網船沿河
捧道元無崩損去處在前年例當麻麥盛時差官修理
捧道督責地主割刈麻麥并滕州開決稻堰泗源磨堰
差人於呂梁百步等硤及濟州牘監督江淮綱運船隻
過硤出牘不令阻滯客旅苟取錢物據新開會通并濟
州汶泗相通河非自然長流河道於兗州立牘堰約泗
水西流垆城立牘堰分汶水入河南會於濟州以六牘
搏節水勢啓開通放舟楫南通淮泗以入新開會通河
至於通州近去歲四月江淮都漕運使司言本司糧運
經濟河至東阿交割前者濟州運司不時移文瀕河官
司修治捧道若有緩急處所正官取招呈省路經歷縣

達魯花赤以下就便斷罪今濟州漕司革罷其河道撥
屬都漕運司管領本司糧運未到東阿凡有阻滯並是
本司遲慢迤南河道從此無人管領不時水勢泛溢隄
岸摧塌澀滯河道又濟州牘前濟州運司正官親臨監
視其押網船戶不敢分爭即日各處官司差人管領與
網官船戶各無統攝爭要水勢及挽越過牘互相毆打
以致損壞船隻浸沒官糧擬將東阿河道撥付江淮都
漕運司提調管領庶幾不誤糧運都省准焉又准江淮
都漕運司副使言除委官看管牘堰外據汶泗垆城二
牘一堰泗河兗州牘堰濟州城南牘乃會通河上源之
喉衿去歲流水衝壞垆城汶河土堰兗州泗河土堰必

行水金鑑卷一百二
二
須移文兗州泰安州差夫修閉又被漲水衝破梁山一
帶堤堰走洩水勢通入舊河以致新河水小澀糧船乞
移文斷事等官轉下東平路修閉上流撥屬江淮漕運
司下流屬之貞管領若已後新河水小直下濟州監牘
官并泰安兗州東平修理據兗州石牘一所石堰一道
垆城石牘一道合用材物已行措置完備必須修理雖
初經之貞相視會計即令不隸管領乞移文江淮漕司
修治其泰安州垆城安梁山一帶隄岸濟州牘等處雖
是撥屬江淮漕司今後倘若水漲衝壞堤堰亦乞照會
東平濟寧泰安如承文字亦仰奉行又東阿須城界安
山牘為糧船不由舊河來往江淮所委監牘官已去目

今無人看管必須之貞修理以此權委人守焉

元史河渠志

濟州河者新開以通漕運也世祖至元十七年七月耿
叅政阿里尚書奏為姚演言開河事令阿合馬與耆舊
臣集議以鈔萬錠為傭直仍給糧食世祖從之十八年
九月中書丞相火魯火孫等奏姚總管等言請免益都
淄萊寧海三州一歲賦入折傭直以為開河之用平章
阿合馬與諸老臣議以為一歲民賦雖多較之官給傭
直行之甚便遂從之十月火魯火孫等奏阿八失所開
河經濟州而其地又有一河傍有民田開之甚便臣等
議若開此河阿八失所管一方屯田宜移之他處不阻
水勢世祖令移之十二月差奧魯赤劉都水及精筭數

者一人給宣差印往濟州定開河夫役令大名衛州新附軍亦往助工三十一年御史臺言膠萊海道淺澀不能行舟臺官玉速帖木兒奏阿八失所開河省遣牙亦速失來謂漕船泛河則失少泛海則損多既而漕臣囊加斛萬戶孫偉又言漕海舟疾且便右丞麥禾丁又奏幹奴兀奴斛凡三移文言阿八失所開河益少損多不便轉漕水手軍人二萬舟千艘見閑不用如得之可歲漕百萬石昨奉旨候忙古斛來共議海道便則阿八失河可廢今忙古斛已自海道運糧回有一二南人自願運糧萬石已許之囊加斛孫萬戶復請用軍驗試海運省院官暨衆議阿八失河所用水手五千軍五千船千

艘畀揚州省教習漕運今擬以此水手軍人就用平灤船從利津海漕運世祖從之阿八失所開河遂廢

元史河渠志

揚州運河宋時嘗設軍疏滌世祖取宋之後河漸壅塞至元末年江淮行省嘗以為言雖有旨濬治有司奉行未見實効仁宗延祐四年十一月兩淮運司言鹽課甚重運河淺澀無源止仰天雨請加修治明年二月中書移文河南省選官洎運司有司官相視會計工程費用於是河南省委都事張奉政及淮東道宣慰司官運司官會州縣倉場官徧歷巡視集議河長二千三百五十里有司差瀕河有田之家雇倩丁夫開修一千八百六十九里倉場鹽司不妨辦課協濟有司開修四百八

十二里運司言近歲課額增多而船竈反日益貧苦宜
令有司通行修治省減官錢省臣奏準諸色戶內顧募
丁夫萬人日支鹽糧錢二兩計用鈔二萬錠於運司鹽
課及減駁船錢內支用差官與都水監河南行省淮東
宣慰司官專董其事廉訪司體察樞密院遣官鎮遏乘
農隙併工疏治

元史河渠志

練湖在鎮江元有江南之後豪勢之家於湖中築隄圍
田耕種侵占既廣不足受水遂致泛溢世祖末年叅政
暗都刺奏請依宋例委人提調疏治其侵占者驗畝加
賦至治三年十二月省臣奏江浙行省言鎮江運河全
藉練湖之水為上源官司漕運供億京師及商賈販載

農民來往其舟楫莫不由此宋時專設人夫以時修濬
練湖瀦蓄潦水若運河淺阻開放湖水一寸則可添河
水一尺近年淤淺舟楫不通凡有官物差民運遞甚為
不便委官相視疏治運河自鎮江路至呂城壩長百三
十一里計役夫萬五百十三人六十日可畢又用三千
餘人浚滌練湖九十日可完人日支糧三升中統鈔一
兩行省行臺分官監督所用船物今歲預備來春興工
合行事宜依江浙行省所擬既得旨都省移文江浙行
省委叅政董中奉率合屬正官親臨督役於是董中奉
言所委前都水少監崇明州知州任奉政鎮江路總管
毛中議等議練湖運河此非一事宜依假山諸湖農民

取泥之法用船千艘船三人用竹筩撈取淤泥日可三載月計九萬載三月之間通取二十七萬載就用所取泥增築湖岸自鎮江在城程公壩至常州武進縣呂城壩河長百三十一里一百四十六步擬開河面闊五丈底闊三丈深四尺與見有水二尺可積深六尺所役夫於平江鎮江常州江陰州又建康路所轄溧陽州田多上戶內差倩若濬湖開河二役並與卒難辦集宜趁農隙先開運河工畢就濬練湖省準所言與都事王徵事等於泰定元年正月至鎮江丹陽縣泊各監工官沿湖相視上湖沙岡黃土下湖茭根叢雜泥亦堅硬不可筩取又議兩役並與相離三百餘里往來監督供給為難

願以所督夫一萬三千五百十二人先開運河期四十七日畢次濬練湖二十日可完繼有江南行臺侍御史及浙西廉訪司副使俱至乃議首事運河備文咨稟遂於是月十七日入役二月十八日省臣奏開濬運河練湖重役也宜依行省所議仍令便宜從事後各監工官言已分運河作三壩依元料深闊丈尺開浚至三月四日工畢數內平江崑山嘉定二州實役二十六日常熟吳江二州長洲吳縣實役二十八日餘皆役三十日已於三月七日積水行舟又監修練湖官言任奉議指劃元料增築隄堰及舊有土基共增闊一丈二尺平面至高底灘脚增築共量斜高二丈五尺依中堰西石碇東

舊堤臥羊灘修築如舊提高闊已及所料之上者遇有崩缺修築合完中堰西石礎至五百婆隄西上增高高一尺有缺亦補之五百婆堤至馬林橋堤水勢稍緩不須修治其隄底間有滲漏者窒塞之三月六日破土九日入役至十一日工畢實役三日歸勘任少監元料開運河夫萬五百十三人六十日畢濬練湖夫三千人九十日畢人日支鈔一兩米三升共該鈔萬八千一十四錠二十兩米二萬七千二十一石六斗實徵夫萬三千五百十二人共役三十三日支鈔八千六百七十九錠三十六兩糧萬三千十九石五斗八升比附元料省鈔九千三百三十四錠三十四兩糧萬四千二石二升其

練湖未畢相視地形水勢再議叅政董中奉又言練湖舊有湖兵四十三人添補五十七名共百人於本路州縣苗糧三石之下二石之上差充專任修築湖岸設提領二員壕寨二人司吏三人於有出身人內選用工部議練湖所設提領人等印信即同湖兵宜咨本省徧行議擬又鎮江路言運河練湖今已開濬若不設法關防徒勞民力除關本路達魯花赤兀魯失海牙總治其事同知哈散知事程郇專管啓閉斗門行省從之

元史河渠志

元憲宗三年癸丑

即宋理宗寶祐元年

世祖募民受鹽入粟轉漕嘉陵

元史世祖本紀

元憲宗四年甲寅

即宋理宗寶祐二年

張柔移鎮亳州以渦水北隘淺

不可舟軍既病涉曹濮魏博粟皆不至乃築甬路自亳
抵汴堤百二十里流深而不能築復為橋十五或廣二
十尺橫以二堡戍之

元史世祖本紀

元憲宗五年乙卯

即宋理宗寶祐三年

秋九月張柔會大帥於符離以

百丈口為宋往來之道可容萬艘遂築甬路自亳而南
六十餘里中為橫江堡又以路東六十里皆水可致宋
舟乃立柵水中唯密置偵邏於所達之路由是鹿邑寧
陵考柘楚止南頓無宋患陳蔡潁息皆通矣

元史世祖本紀

元世祖中統二年

即宋理宗景定元年

秋七月辛巳命西京宣撫司造

船備西夏漕運 八月己酉勅西京運糧於沙井北京
運糧於魚兒泊 九月丙子敕今歲田租輸沿河近倉

官為轉漕不可勞民

元史世祖本紀

元世祖中統三年

即宋理宗景定二年

夏四月辛卯修河中禹廟賜名

建極宮

八月己丑郭守敬請開玉泉水以通漕運從

之

元史世祖本紀

守敬字若思邢臺人從劉秉忠學中統三年用

薦世祖召見面陳水利六事其一中都舊漕河東至通
州引玉泉水以通舟歲可省僱車錢六萬緡通州以南
於蘭榆河口徑直開引由蒙村跳梁務至楊村還河以
避浮雞洶盤淺風浪遠轉之患其二順德達泉引入城
中分為三渠灌城東地其三順德澧河東至古任城失
其故道沒民田千三百餘頃此水開修成河其田即可
耕種自小王村經滹沱合入御河通行舟筏其四磁州

東北滏漳二水合流處引水由滏陽邯鄲洺州永年下
經雞澤合入澧河可灌田三千餘頃其五懷孟沁河雖
澆灌猶有漏堰餘水東與丹河餘水相合引東流至武
陟縣北合入御河可灌田二千餘頃其六黃河自孟州
西開引少分一渠經由新舊孟州中間順河古岸下至
溫縣南復入大河其間亦可灌田二千餘頃每奏一事
世祖歎曰任事者如此人不爲素餐矣授提舉諸路河
渠四年加授銀符副河渠使至元元年從張文謙行省
西夏先是古渠在中興者一名唐來其長四百里一名
漢延長二百五十里他州正渠十皆長二百里支渠大
小六十八灌田九萬餘頃兵亂以來廢壞淤淺守敬更

立牘堰皆復其舊二年授都水少監守敬言舟自中興
沿河四晝夜至東勝可通漕運及見查泊兀郎海古渠
甚多宜加修理又言金時自燕京之西麻峪村分引盧
溝一支東流穿西山而出是謂金口其水自金口以東
燕京以北灌田若干頃其利不可勝計兵興以來典守
者懼有所失因以大石塞之今若按視故蹟使水得通
流上可以致西山之利下可以廣京畿之漕又言當於
金口西預開減水口西南還大河令其深廣以防漲水
突入之患帝善之十二年丞相伯顏南征議立水站命
守敬行視河北山東可通舟者爲圖奏之二十八年守
敬陳水利十有一事其一大都運糧河不用一畝泉舊

源別引北山白浮泉水西折而南經瓮山泊自西水門入城環匯於積水潭復東折而南出南水門合入舊運糧河每十里置一牐北至通州凡為牐七距里許上重置斗門互為提閘以過舟止水帝覽奏喜曰當速行之於是復置都水監俾守敬領之帝命丞相以下皆親畚鍤倡工待守敬指授而後行事先是通州至大都陸運官糧歲若干萬石方秋霖雨驢畜死者不可勝計至是皆罷帝還自上都過積水潭見舳艫蔽水大悅名曰通惠河賜守敬鈔萬二千五百貫仍以舊職兼提調通惠且立牐麗正門西令舟楫得環城往來志不就而罷三

十一年拜昭文館大學士知太史院事大德二年召守敬至上都議開鐵幡竿渠守敬奏山水頻年暴下非大為渠堰廣五七十步不可執政吝於工費以其言為過縮其廣三之一明年大雨山水注下渠不能容漂没人畜廬帳幾犯行殿成宗謂宰執曰郭太史神人也惜其言不用耳延祐三年卒

元史郭守敬傳

郭守敬奉詔興水利上自昌平縣白浮村引神山泉西折而南過雙塔榆河一畝玉泉諸水經甕山泊至西水門入都城按神山白浮皆在州之東南地勢西高東下守敬乃能引之而西是不可曉

顧炎武昌平山水記

元世祖至元元年

即宋理宗景定五年

二月壬子發北京都元帥阿海

所領軍疏雙塔漕渠 四月戊申以彰德洛磁路引漳
滏洹水灌田致御河淺澀鹽運不通塞分渠以復水勢
五月乙亥詔遣唆脫顏郭守敬行視西夏河渠俾具

圖來上

元史世祖本紀

元世祖至元二年

即宋度宗
咸淳元年

十二月戊辰命選善水者一人

沿黃河計水程達東勝可通漕運馳驛以聞 六月辛

巳大霖雨自是日至癸巳不止京師河南北水溢御河

沁河渾河水溢没人畜廬舍甚衆 秋七月己亥漳河

泛溢至廣平城下

元史世祖本紀

元世祖至元三年六月衛輝淫雨至七月丹沁二河泛
漲與城西御河通流平地深二丈餘漂没人民房舍田

禾甚衆民皆棲於樹木郡守僧家奴以舟載飯食之移

老弱居城頭日給糧餉月餘水方退 十一月戊戌瀕

御河立漕倉 十二月丁亥鑿金口導盧溝水以漕西

山木石

元史世祖本紀

元世祖至元六年十二月戊子築東安渾河堤

元史世祖

本紀

元世祖至元七年三月丙辰浚武縣御河

元史世祖本紀

朱文英知平鄉縣至元七年奉命開南和之澧河將

通漕渠文英相視地形曰此濡濕之地農事方殷安

可奪有用之功以興無益之務乎慨然言之於總府

遂罷役去官後邑人思之刻石頌德

畿輔通志

元世祖至元九年十月乙未築渾河堤 元史世祖本紀

元世祖至元十三年正月甲午穿濟州漕渠 七月甲

寅以楊村至浮雞泊漕渠洄遠改從孫家務 八月已

巳穿武清蒙村漕渠 九月辛丑遣瀘州屯田軍四千

轉漕重慶 元史世祖本紀

元世祖至元十四年十二月乙亥永年縣水免今年田

租導任河 元史世祖本紀 董文用藁城人為衛輝路總管至元十

四年詣汴漕司言事適漕司議通沁水北東合流御河

以便漕文用曰衛郡地最下大雨時行沁水輒溢出百

十里間雨更甚水不得達於河即浸淫及衛今又引之

使來豈唯無衛將無大名長蘆矣會朝廷遣使相地形

上言衛州城中浮屠最高者纔與沁水平勢不可開也

事遂寢 元史董文用傳

元世祖至元十六年六月辛丑以通州水路淺舟運甚

難命樞密院發軍五千仍令食祿諸官催役千人開浚

以五十日訖工 元史世祖本紀

元世祖至元十七年二月庚子發侍衛軍三千浚通州

運糧河 七月戊午用姚演言開膠東河及收集逃民

屯田漣海 元史世祖本紀

元世祖至元十九年十二月癸卯浚濟川河 元史世祖本紀 是年

命張君佐率新附漢軍萬人修膠西閘壩以通漕運二

十一年兼海道運糧事 元史張君佐傳 君佐為鎮國大將軍仍砲手元帥

元世祖至元二十年五月己卯用王積翁言江南運糧於阿八赤新開神山河及海道兩道運一八月丁未濟州新開河成十月癸卯中書省臣言阿八赤新開河二處皆有倉宜造小船分海運從之元史世祖本紀是月涿州拒馬河溢元史五行志

元世祖至元二十一年二月辛巳浚揚州漕河己亥罷阿八赤開河之役以其軍及水手各萬人運海道糧四月己亥涿州拒馬河決衝突三十餘里十月戊子命北京宣慰司修灤河道十二月乙巳以丁壯萬人開神山河立萬戶府以總之元史世祖本紀

俞時中修任城東閘記云至元二十年朝廷初以江

淮水運不通乃命前兵部尚書李粵魯赤等調丁夫給庸糧自濟州任城委曲開穿河渠導洸汶泗水由安民山至東阿三百餘里以通轉漕然地勢有高下水流有緩急故不能無阻艱之患二十一年有司創為石閘者八各置守卒春秋觀水之漲落以時啓閉雖歲或亢暘而利足以濟舟楫惟是任城閘東距師家莊表六十里土壤疏惡霖潦灌注承乏歲月至是始壞時都水少監分都水監事石抹奉議適膺其任聞之中書省易而新之陶土為甃采石於山其材用所需不費於官不取於民率指授役夫為之不數月厥功告成仍即其地之西偏修飾廳事以為使者往

來休憩之所公退因錄其同事者職役姓氏俾刻諸石以告後之來者

山東全河備考

元世祖至元二十二年春正月戊寅發五衛及新附軍浚蒙村漕渠 二月乙巳增濟州漕舟三千艘役夫萬二千人初江淮歲漕米百萬石於京師海運十萬石膠萊六十萬石而濟之所運三十萬石水淺舟大恒不能達更以百石之舟舟用四人故夫數增多 塞渾河堤決役夫四千人 穿河西務河 丙辰詔罷膠萊所鑿新河而以軍萬人隸江浙行省習水戰萬人載江淮米泛海由利津達於京師 戊辰增濟州漕運司軍萬二千人 十一月癸巳敕漕江淮米百萬石泛海貯於高

麗之合浦

元史世祖本紀

元世祖至元二十三年十一月乙丑中書省臣言朱清等海道運糧以四歲計之總百一萬石斗斛耗折願如數以償風浪覆舟請免其徵從之遂以昭勇大將軍沿海招討使張瑄明威將軍管軍萬戶兼管海道運糧船朱清並為海道運糧萬戶仍佩虎符

元史世祖本紀

祖本紀

元世祖至元二十五年正月戊申詔中興西涼無得沮
壞河渠 二月庚申浚滄州鹽運渠 四月癸亥渾河
決發軍築堤捍之 冬十月庚午桑哥言安山至臨清
為渠二百六十五里若開浚之為工三百萬當用鈔三
萬錠米四萬石鹽五萬斤其陸運夫萬三千戶復罷為
民其賦入及芻粟之估為鈔二萬八千錠費略相當然
渠成亦萬世之利請以今冬備糧費來春浚之制可

元史世祖本紀

何榮祖廣平人為山東東西道按察使時宣慰使樂實
姚演開膠州海道有制禁戢諸人沮撓糧船遇暴風多
漂覆樂實弗信督諸漕卒償之榜掠慘毒自殺者相繼

按察官懼違制莫敢言榮祖曰第言之若朝廷見譴吾
自當之即草辭以奏詔免其徵召入為尚書叅知政事

元史何榮祖傳

元世祖至元二十六年正月壬寅海船萬戶府言山東
宣慰使樂實所運江南米陸負至淮安易聞者七然後
入海歲止二十萬石若由江陰入江至直沽倉民無陸
負之苦且米石省運估八貫有奇乞罷膠萊海道運糧
萬戶府而以漕事責臣當歲運三十萬石詔許之 二
月辛亥濟滄州御河 夏四月庚午沙河決發民築堤
以障之 五月庚辰發武衛親軍千人浚河西務至通
州漕渠 辛丑御河溢入惠通渠漂東昌民廬舍 秋

七月辛巳開安山渠成河渠官禮部尚書張孔孫兵部
郎中李處巽員外郎馬之貞言開魏博之渠通江淮之
運古所未有詔賜名會通河置提舉司職河渠事

元史世

祖本紀

韓仲暉至元間為壽張尹時糧運艱難暉奏開會通
河以便公私漕販于是遣官總理河成至今賴之

山東

通志

至元中以壽張縣尹韓仲暉等言自安民山開河北
至臨清凡二百五十里引汶絕濟直屬漳御建牖三
十有一度高低分遠近以節蓄洩賜名會通河邨
文莊曰會通河之名始見於此然當時河道初開岸

狹水淺不能負重每歲之運不過數十萬石非若海
運之多也是故終元之世海運不罷

通漕類編

卷第一百二

之匯帝亟欲其成又不欲役其細民勅四怯薛人及諸
府人專其役度其高深畫地分賦之刻日使畢工月赤
察兒率其屬著役者服畚鍤即所賦以倡趨者雲集依
刻而渠成賜名曰通惠河公私便之帝語近臣曰是渠
非月赤察兒身率衆手成不速也元史月赤察兒傳是年源遷都水
監開通惠河由文明門東七十里與會通河接置閘七
橋十二人蒙其利授同知湖南道宣慰司元史高源傳

元世祖至元二十九年六月辛亥中書省臣言今歲江
南海運糧至京師者一百五萬石至遼陽者十三萬石
比往歲無耗折不足者 八月丙午用郭守敬言浚通
州至大都漕河十有四役軍匠二萬人又鑿六渠灌昌

平諸水

十月戊子詔浚浙西河道導水入海

元史世祖

本紀

元世祖至元三十年三月庚申以平章政事范文虎董
疏漕河之役 七月丁丑賜新開漕河名曰通惠 十
月癸未賜冠城疏河董役軍民衣各一襲戊子詔修汴
堤 是月甲辰以段貞董開河修倉之役加平章政事

元史世祖本紀

是年秋車駕還自上都過積水潭見舳艫蔽水天顏
爲之開懌特賜都水監郭公錢一萬二千五百緡仍
以舊職兼提調通惠河漕運事元名臣事略
都人呼飛放泊爲南海子積水潭爲西海子按海子

之名見於唐季王鎔為鎮帥有海子園嘗館李匡威
於此北人凡水之積者輒目為海若寶坻之七里海
昌平北之四海冶是也元時運船直至積水潭王元
章詩燕山三月風和柔海子酒船如畫樓想見舟楫
之盛自武寧改築北平城後運河海子截而為二城
內積土日高雖有舟楫橋梁不能度矣詠歸錄
禁城中外海子即古燕市積水潭也源出西山一畝
馬眼諸泉繞出甕山後匯為七里灤紆迴向西南行
數十里稱高粱河將近城分為二外繞都城開水門
內注潭中入為內海子繞禁城出異方流玉河橋合
外隍入於大通河湧幢小品

元世祖至元三十一年八月己丑成宗已即位以大都留守段

貞平章政事范文虎監浚通惠河給二品銀印十月

乙未朱清張瑄從海道歲運糧百萬石以京畿所儲充

足詔止運三十萬石元史世祖本紀

元成宗元貞元年十二月甲子減海運脚價鈔一貫計

每石六貫五百文著為令元史成宗本紀

元成宗元貞二年十一月辛未增海運明年糧為六十

萬石元史成宗本紀

元成宗大德二年三月丁亥朔罷大名路故河隄堰元史

成宗本紀

元成宗大德三年八月平灤郡南灤河溢元史成宗本紀

元成宗大德四年春正月癸卯浚淮東漕渠

元史成宗本紀

元成宗大德五年十月丙辰朔以畿內歲飢增明年海

運糧為百二十萬石

元史成宗本紀

元成宗大德六年春正月乙卯築渾河隄長八十里仍

禁豪家毋侵舊河令屯田軍及民耕種 夏四月乙亥

浚永清縣南河戊子修盧溝上流石徑山河隄 五月

歸德府徐州邳州睢寧縣雨五十日沂武二河合流水

大溢 東安州渾河溢壞民田一千八百餘頃

元史成宗

本紀

元成宗大德七年五月甲寅浚上都灤河 六月乙巳

命甘肅行省修阿合潭曲尤壕以通漕運 十月戊子

以浙江年穀不登減海運糧四十萬石

元史成宗本紀

元成宗大德八年五月壬申中書省臣言吳松江實

海口故道潮水久淤凡湮塞良田百有餘里况海運亦

由是而出宜於租戶萬五千人浚治歲免租人十五石

仍設行都水監以董其程從之 十一月壬申增海漕

米為百七十萬石

元史成宗本紀

是年建魚臺孟陽薄石閘趙文昌記略云聖元以神

武定天下遐邇率職來享來庭而江淮漕運商旅之

轉販仕宦之往來非舟楫無以濟不通此會通河之

所以作也河工告成於今幾二十年歲月滋久霖潦

浸淫岸移谷遷不無埋塞都水監上下巡視求其利

行水金鑑卷一百三
四
病以沛縣之金溝沽頭魚臺之孟陽薄沙深水淺地
形峻急皆不能舟遇有官物往來必驅率瀕河之民
推之挽之者不下千餘妨農動衆民恒苦之遂條陳
其事都省委右都事王潛都水太監馬之貞等臨視
與所說合議曰夫水積之不厚不足以負大舟蓄之
不廣不足以供下洩今莫若立堰以積水立閘以通
舟堰貴長閘貴堅漲水時至使漫流於上如斯而已
矣於是視地之高下程廣狹量淺深繪圖計工以報
都省議修之從孟陽薄始今值歲晚先辦物料興工
以春首爲期用夫匠一千二百三十二名監夫不足
於近邑差雇五百七十二名就給工價米糧一切物

料官爲和買給中統鈔五萬五千緡不敷於濟寧路
官錢內支選差覈實司提舉仇銳來董是役預辦所
需金石材木諸物指分工役其堰橫長一十二丈中
爲閘門外石內甃高一丈四尺基縱廣八丈閘下廣
五丈殺之如壇級以及於上五分廣之三起於大德
八年正月訖於五月凡用工十七萬六千九百九十
中統鈔十萬三千三百五十緡糧一千二百四十七
石落成之日鼓聲四起閘門啓鑰篙師序次以進前
旗一指通數十百艘於談笑之頃乃命謝里高立不
遠千里而來請文至再予不揆因記修閘之歲月如
此

山東全河備考

元成宗大德十年春正月丙午浚吳松江等處漕河
庚戌濬真陽等州漕河令鹽商每引輸鈔二貫以為備
工之費 元史成宗本紀

元成宗大德十一年九月丙子 武宗已登極矣 中書省臣言兩淮

漕河淤澀官議疏浚鹽一引帶鈔二貫以為備費計鈔

二萬八千錠今河流已通宜移以賑饑民制可 十月

丙辰中書省奏常歲海漕糧百四十五萬石今江浙歲

儉不能如數請仍舊例湖廣江西各輸五十萬石並由

海道達京師從之 元史成宗本紀

元武宗至大三年二月己未浚會通河給鈔四千八百

錠糧二萬一千石以募民命河南省平章政事塔失海

牙董其役 七月己亥禁權要商販挾聖旨懿旨令旨

阻礙會通河民船者 十月壬申江浙省臣言曩者朱

清張瑄海漕米歲四五十萬至百十萬時船多糧少顧

直均平比歲賦斂橫出漕戶困乏逃亡者有之今歲運

三百萬漕舟不足遣人於浙東福建等處和顧百姓騷

動本省左丞沙不丁其弟合八失及馬合謀但的澈浦

楊家等皆有舟且深知漕事乞以為海道運糧都漕萬

戶府官各以已力輸運官糧萬戶千戶並如軍官例承

襲寬恤漕戶增給顧直庶有成效尚書省以聞請以馬

合謀但的為遙授右丞海外諸蕃宣慰使都元帥領海

道運糧都漕運萬戶府事設千戶所十每所設達魯花

赤一千戶三副千戶二百戶四制可 十一月戊子以朱清子虎張瑄子文龍往治海漕以所籍宅一區田百頃給之

元史武宗本紀

元仁宗皇慶元年九月丁酉增江浙海漕糧二十萬石

元史仁宗本紀

元仁宗延祐元年六月涿州范陽房山二縣渾河溢壞民田四百九十餘頃 七月乙亥武清縣渾河隄決淹沒民田發廩賑之：十二月庚子遣官浚揚州淮安等處運河

元史仁宗本紀

是年於金溝沽頭兩牐中置隘牐二以限船 自新開會通河路爲大船阻碍餘船不得往來乃置隘牐

闊一丈限大船止去一百五十料船行其後愚民嗜利故造減舷添倉長船至八九十尺甚至百尺皆五六百料入牐重輒淺閣乃又於隘牐下約八十步河北立二石中間相離六十五丈舟至量如式方許入牐長者罪遣退之

南河全考

元仁宗延祐二年春正月丙寅霖雨壞渾河隄堰沒民田發卒補之又發卒浚鄴州漕河

元史仁宗本紀

元仁宗延祐四年十一月己卯復浚揚州運河

元史仁宗本紀

本紀

是年重修金口閘劉德智記云皇元膺天命撫方夏極天地之覆載皆臣服惟謹東南去京師萬里粟米

絲枲織縞貝錦象犀羽毛金珠琨蕩之貢視四方尤繁重車輓陸運民甚苦之至元中穿會通河引泗汶會漳以達於幽由是天下利於轉輸泗之源會雩於兗之東門其東多大山水潦暴至漫為民患職水者訪其利病隄土以防其溢束石以洩其流其一洞歲久石摧不足以吞吐今近北改作二洞以開啓閉中書省以聞天子可其議命下之日當延祐四年都水太監閻開分治山東寬勤恪恭敏於事會曹椽王元從理簿書壕寨官李克溫董工役役長張聚李林路詳宋贊秦澤分任其事夫匠一千九十石二千五百甄三萬灰五萬木六千四百鐵錠鐵鉤鐵環不敷取

諸官錢以買兗州知州尋敬提調州吏鹿果經始於四年閏正月成於三月工告訖大祠廟諱冥醜酒割牲燔燎瘞埋吹擊笙鼓風日清明役徒謳歌人神歡悅乃相與請辭鑿諸石以紀其始終遂以命德智洪惟皇元起漠北以深仁厚德奄有天下公家世鼎鼎參贊化育今誠能實於已而勤於官忠於上而信於下言不妄發事不輕改故民易信而功易成雖然又豈水曹為然推此誠實以理天下則被澤溥矣辭不獲命因書所聞以為記

山東全河備考

元仁宗延祐六年閏八月甲子浚會通河 九月癸卯浚鎮江練湖 十月己卯浚通惠河

元史仁宗本紀

元仁宗延祐七年八月英宗已登極矣霸州文安大成等縣渾河溢壞民田廬元史仁宗本紀

元英宗至治元年三月丁丑發民丁疏小直沽白河

六月己巳渾河溢被災者二萬三千三百戶 霸州大

水渾河溢被災者三萬餘戶 秋七月戊寅通州潞縣

榆棣水決 庚辰滹沱河及范陽縣巨馬河溢 乙酉

大雨渾河防決元史英宗本紀

張仲仁都水丞至治元年改建會源閘自臨清南至彭城延袤七百里疏其淤塞築其隄防為杠九十有八為梁五十有八建分司及會源石佛師莊閘署揭

後斯記云皇帝元年夏六月都水丞張侯改作濟州會源閘成明年春二月具功狀遣其屬孟思敬至京師請文勒石惟我元受命定鼎幽薊經國體民綏和四海辨方物以定貢賦穿河渠以逸漕度乃改任城為濟州以臨齊魯之交據燕吳之衝導汶泗以會其源置閘以分其流西北至安民山入於新河逮於臨清地降九十尺為閘十六以達於漳南至沽頭地降百十有六尺為閘十又南入於河北至奉符為閘一以節汶水東北至兗州為閘一以節泗水而會源閘制於其中歲久政弛漕度用弗時先皇帝以為憂延祐六年冬詔以侯分治東阿始修復舊政南疏北導

行水金鑑卷一百三
九
靡所寧處明年冬以及期請代弗許行視濟閘峻怒
狠悍歲數壞舟楫土崩石泐岌不可持乃伐石區里
之山轉木淮海之濱度工即功明年皇帝建元至治
三月甲戌朝侯朝至於河上率徒相宜導水東行竭
其上下而竭其中以儲衆材撤故閘夷坳泓徙其南
二十尺降七尺以爲基下錯植巨栗如列星貫以長
松實以白灰槩視其地無有罅漏衡五十尺縱百六
十尺八分其縱四爲門縱遜其南之三北之一以敵
水之奔突震蕩五分其衡二爲門容折其三以爲兩
壟四分其容去其一以爲門崇廉其中而翼其外以
附於防三分門縱間於北之二以爲門中央樹石鑿

以納懸板五分門縱去其一以爲鑿崇翼之外更爲
石防以禦水之洄洑衝薄縱皆三百三十尺爰琢爰
鑿犬牙相入苴以白蔴固以石膠關以勁鐵冠以飛
梁越六月十有三日乙卯訖功大會羣屬宴於河上
以落之工徒咸在旄倪四集酒舉樂作揮閘決竭艤
櫂啓鑰水平舟行伐鼓懽呼稱功頌德雷動雲合且
拜曰惟聖天子繼志述事不易任以成厥功惟億萬
年享天之休是役也以工計石工百六十人木工千
人金工五人土工五人徒千四百二十人以材計木
萬一百四十有一石五千一百二十有八其廣厚皆
倍於舊甃二億一千二百有五十以斤計鐵二萬五

千五百麻二千三百石之灰三億二萬三百三十有四以石計粟千二百有五十視他閘三之視故閘倍之其出於縣官者鐵若麻十之七石五之一粟五之三餘一以便宜調度不以煩民初侯至之明年凡河之隘者闢壅者滌決者塞拔藻荇禁芻牧隆其防而廣其址修其石之岩阤穿漏者築其壤之疏惡者延袤羸七百里防之外增爲長隄以闕暴漲而河以安流潛爲石竇以納積潦而瀕河三郡之田民皆得耕種又募民采馬蘭之實種之新河兩涯以錮潰沙北自臨清南至彭城東至陪尾絕者通之鬱者澌之爲杠九十有八爲梁五十有八而挽舟之道無不夷矣

乃建分司及會源石佛師莊三閘之署以嚴官守樹河伯龍君祠入故都水少監馬之貞兵部尚書李粵魯赤中書斷事忙速祠三以迎休報勞凡河之所經命藏冰以待渴者種樹以待休者遇流殍則男女異廩之餓者爲粥以食之死而藏饑而活者歲數千人是以上知其忠下信其令用克果於茲役然古者三載考績三考黜陟幽明故人才得以自見向使侯竟代去雖懷極忠甚智無能究於其職是亦侯之遇也惟此閘地最要役最大馬氏之後侯之功爲最盛故詳於是碑以告後之人侯名仲仁河南人其辭曰昔在至元惟忠武王自南還歸請開河渠自魯涉齊以

行水金鑑卷一百三
達京師河渠既成四海率從萬世是資朝帆夕檣垂
四十年孰慢而墮翼翼張侯受命仁宗號令風馳徵
工發徒既滌既疏濟閘攸基先難而興既星而休觸
冒炎曦疾者藥之死者榘之奚有渴飢拊循勞徠信
賞必罰勿亟勿遲十旬之間適績於成知罔或遺洋
洋河流中有行舟若遵大達舳艫相啣罔敢後先亦
罔敢稽賢王才侯自北自南顧盼嗟咨曰惟京師為
天下本本隆則固惟帝世祖既有南土河渠是務四
方之共於千萬里如出跬步聖繼明承命官選材惟
侯之遇昔者舟行日不數里今以百數昔者舟行歲
不數萬今以億慮惟公乃明惟勇乃成惟廉則恕汶

泗之會有截其闢有苑其樹功在國家名在天下永

世是度

山東全河備考

王結改東昌路境有黃河故道而會通隄遏其下流夏
月潦水壞民麥禾結疏為斗門以泄之民獲耕治之利

至治二年參議中書省事

元史王結傳

元英宗至治二年五月己巳修滹沱河隄 六月丙子

修渾河隄

元史英宗本紀

元英宗至治三年二月己巳修廣惠河牐十有九所

十二月壬戌浚鎮江路漕河及練湖役丁萬三千五百

人

元史英宗本紀

至治三年江浙行省言鎮江運河全藉練湖之水為

上源漕運商販舟楫無不由此以供億前朝嘗濬此湖豬蓄潦水若運河水淺開放練湖一寸可添河水一尺近年淤淺以致遞運不通乞加修治制可工畢又置河兵百人專任修理

通漕類編

元泰定帝泰定元年夏四月甲子發兵民築渾河隄六月大同渾源河真定滹沱河皆溢並漂民廬舍七月戊申大都路固安州清河溢順德路任縣沙澧洛水溢定州屯河溢山崩免河渠營田租八月丁丑罷浚玉泉山河役九月癸丑奉元路長安縣大雨澧水溢延安路洛水溢十月壬申真州珠金沙河松江府吳江州諸河淤塞詔所在有司傭民丁浚之

元史泰定帝

本紀

元泰定帝泰定二年閏正月己巳修滹沱河堰三月辛酉咸平府清河澧河合流失故道壞隄堰勅蒙古軍千人及民丁修之八月辛丑衛輝路汲縣河溢九月丁丑浚河間陳玉帶河開元路三河溢是歲御河水溢

元史泰定帝本紀

元泰定帝泰定三年七月東安檀順鄆四州雨渾河決温榆水溢傷稼

元史泰定帝本紀

元泰定帝泰定四年春正月丁卯浚會通河三月壬戌渾河決發軍民萬人塞之五月睢州河溢七月雲州黑河水溢八月滹沱河水溢發丁浚冶河以殺

其勢

元史泰定帝本紀

自當改工部員外郎中書省委開渾河自當往視之以為水性不常民力亦瘁難以成功言於朝河役乃罷

元史

自當傳

元文宗天曆二年夏四月壬辰浚鄆州漕運

八月乙

巳浚通惠河

元史文宗本紀

元文宗至順三年三月奉元朝邑縣洛水溢

五月丁

酉濬沱河決沒河間清州等處屯田

元史文宗本紀

元順帝元統元年二月灤河漆河溢永平諸縣水災

六月涇河溢關中水災

元史順帝本紀

李黼穎人遷宣文閣監書博士中書命黼巡視河渠黼

上言曰蔡河源出京西宋以轉輸之故平地作隄今河

底填淤高出地面秋霖一至橫潰為災宜按故迹修浚

他日東河或有不測之阻江淮運物當由此分道達京

萬世之利也不報升秘書太監

元史李黼傳

元順帝至元二年五月乙卯至於六月甲申湍河白河

大溢水為災

元史順帝本紀

以轉漕弗便乃自任城開河分汶水西北流至須城
之安民山以入清濟故瀆通江淮漕至東阿由東阿
陸轉僅二百里抵臨清下漳御輸京師二十六年又
自安民山穿渠北至臨清引汶絕濟直屬漳御於是
汶之利被南北矣始輔國直堰城西北隅作石斗門
一後都水少監馬之貞又於其東作雙虹懸門開虹
相連屬分受汶水既又以虹石水易圯乃改西虹爲
今閘制通謂之東閘謂輔國所作斗門爲西閘後改
作址高水不能入獨東閘受水汶水盈縮不常歲常
以秋分役丁夫采薪積沙於二閘左絕汶作堰約汶
水三之二入洗至春全竭餘波以入霖潦時至慮其

衝突則堅閉二閘不聽其入水至徑壞堰而西循故
道入海故汶之堰歲修延祐五年改作石堰五月堰
成六月爲水所壞水退亂石齟齬壅沙河底增高自
是水歲溢爲害至元四年秋七月大水潰東閘突入
洗河兩閘被其害而洗亦爲沙所塞非復舊河矣初
之貞爲沙堰也有言作石堰可歲省勞民之貞曰汶
魯大川底沙深闊若修石堰須高平水五尺方可行
水沙漲淤平與無堰同河底填高必溢爲害况河上
廣石材不勝用縱竭力作成漲濤懸注傾敗可待晉
杜預作沙堰於宛陽竭白水溉田缺則補之雖屢勞
民終無水害固知川不可塞也且曰後人勿聽浮議

行水金鑑卷一百四
妄興石堰重困民壅過漲水大爲民害重修堰城閘
因自作記勒其言於石至是果如其言閘壞岸崩碑
沉於水爲土石所壓是年九月都水監馬元公來治
會通河行視至埧城謂衆曰埧城泆汶之交會通之
喉襟閘壞河塞上源要害役有先於此者乎於是用
前監丞沈溫公闢爲一大閘之議命濠寨官梁仲祥
李讓計徒庸度材用量工程乃以狀上從其請明年
二月命工入山取石陶甃煨灰以濠寨官王守恭董
之市物於有司謀將以五月經始衆議以爲茲役實
大非朝夕可成暑雨方行必妨興事曷以來年公曰
霖雨天道豈可預必安能優游度日待來年以已事

誘後人乎乃親爲經營揆度以舊址弊於屢作改卜
地於其東掘地及泉降汶河底四尺順水性也袤其
南北爲尺百廣其東西爲尺八十下於平地爲尺二
十有二土木之工又入其下八尺土爲石基以承閘
閘之崇於地平自基以上縮掘地之深一尺兩壁直
南北爲身皆長五十尺其南張兩翼爲雁翅皆長四
十五尺其北短折以東西各附於旁亦長四十五尺
不爲兩翼斂其前隘漲水也前盡基肩岸受水欲其
前也後遜基八之一壘石爲厓承之出基之南五尺
長爲尺二十有五五分基之廣闊其中之一以爲明
入明三分身之一爲金口廣尺深咫板十有三方盈

金口之廣長亘明入金口兩端各盡其身上下以啓
閉者十二其一不動闕以大石爲兩臬夾制其前卻
始議叅用新舊石舊石皆薄小而新石少公因爲度
材所堪差別其用無尺寸之枉新遂以贏又皆大石
自基至顛凡十一疊舊一不用焉石相疊比則以鐵
沙磨其際必脗合無間故其締構之土鈎砌之密會
通諸閘所未有凡用石大小以段計二千六十有奇
自方以尺計三萬三千六百五十甃以萬計一千有
六石灰以斤計四十六萬三千瓦礫以擔計二萬四
千木大小以株計一萬三百一十鐵剛柔以斤計三
萬九百一十五麻炭諸物稱是糜錢一萬七千餘緡

徒役千人木石之工二百八十人始事於五月七日
畢役於九月十日閘旣成衆請識其事於石屬筆於
予予曰汶古名川昔畢公馬公用之則爲轉漕之益
爲灌溉之利後人用之則有橫潰之憂有墊溺之患
水性非異蓋用之善不善也馬公旣善用之又碑其
言以示來者其爲慮深矣不有茲役曷彰馬公之識
其言已驗碑付於水而改作石堰之碑尚存豈天忌
馬公之言先發其機耶將使後人獨受其害而不蒙
其利耶惟是雨暘時若漕運無愆天其或者悔禍於
人俾思馬公之言乎旣不獲辭遂爲敘其始末以見
今日堰城閘水利喉襟且表馬公之言爲鑒

行水金鑑卷一百四
四
也先不華都水監丞至正初建黃棟林新閘楚惟善
記曰會通河蕙汶泗北絕濟合漳南復泗水故道入
於河自漳抵河袤千里分流地峻散渙不能負舟前
後置閘若沙河若穀亭者十三新店至師氏莊猶淺
澀有難處每漕船至此上下畢力終日叫號進寸退
尺必資車於陸而運始達議立閘久不決都水監丞
也先不華分治東平之明年緝熙前功以紓民力慨
然以興作爲己任乃躬相地宜黃棟林適居二閘間
遂即其地庀徒藏事經始於至正改元春二月訖工
於夏五月辛酉閘基深常有四尺廣三其深有六尺
長視廣又尋有七尺閘基長三分基之一崇弱五寸

不及身之半又於東岸創河神祠西岸創公署制度
纖悉備極精緻落成之日舟無留行役者忘勞居者
聚觀往來者歡忭稱慶僚佐耆宿衆相與謀謂不伐
石以識無以彰公之勤且懼來者之功不繼而前功
遂隳也先是役民於河凡大興作率有常廩是役將
興時適薦饑公請俾貧窶者得竄其身藉以有養久
未獲命不忍坐視斯民餓且殍遂出公帑人貸錢二
千緡約來春入役還官無何糧亦至民爭趨令其軫
民瘼如此又初開月河於河東岸闢地及咫礪礪錯
出鍤無所施迨營閘基近西數武黃壤及泉訖無留
礙精誠感格鬼神陰有以相之也公爲人明敏果斷

操守絕人讀書一過目輒不忘律學醫方靡不精究始由近侍三轉官受今除是役也董工於其所者令史李中壕寨官薛源政其工師徒長具列碑陰

二記並

山東全河備考

許有壬轉中書左丞後至正二年囊加慶善八及字羅帖木兒獻議開西山金口導渾河踰京城達通州以通漕運丞相脫脫主之甚力有壬曰渾河之水湍悍易決而足以爲害淤淺易塞而不可行舟况地勢高下甚有不同徒勞民費財耳不聽後卒如有壬言

元史許有壬傳

元順帝至正二年正月丙戌開京師金口河深五十尺廣一百五十尺役夫十萬

元史順帝本紀

伯顏察兒同知東平路事至正二年浚洸河淺澀者五十六里李惟明記云洸河乃汶水之支流也名不載於傳記或因舊而加以新名尤不可知其源則出於泰山郡萊蕪縣原山之陽折而之南達於會通漕運南北其利無窮會通之源洸也洸之源汶也時霖雨作泰岱萬壑溝瀆之間合注而之汶洪濤洶湧泥沙溷奔徑入於洸此洸所以淤填也至元六年監丞宋公浚自閘口至石刺事鑿於珉然洸之源雖通而其流猶梗公謂不疏其流源將安之又恐前功徒費後患復萌使會通之津從而涸也詢及其佐得壕寨岳聚所度自石刺至高吳橋南王家道口淺澀者延

行水金鑑卷一百四
六
衰五十六里百八十步呈準中書符下東平濟寧兼
贊厥役本監及二路夫以口計者萬有二千浚自至
正二年二月十八日落成於三月十四日以舉武計
者二萬三百四十有奇以尺爲工計者四十萬七百
數同知東平路事伯顏察兒僉議少監公之功宜勒
石以昭悠久乃請文於予義弗獲辭遂援筆而記其
歲月 山東全河備考

元順帝至正四年六月河南鞏縣大雨伊洛水溢漂民
居數百家 七月灤河水溢出平地文餘 元史順帝本紀
是年夏五月大雨黃河水溢平地深二丈許北決白
茅隄六月又北決金場瀕河郡邑濟寧單州虞城碭

山金鄉魚臺豐沛定陶楚止武城以至曹州東明鉅
野鄆城嘉祥汶上任城等處皆罹水患民老弱昏墊
壯者流離四方水勢北侵安山沿入會通運河省臣
以聞朝廷患之督大臣訪求治河方略 南河全考

元順帝至正九年三月丁酉壩河淺澀以軍士民夫各
一萬浚之 五月白茅河東注沛縣遂成巨浸 元史順帝

本紀

元順帝至正十年八月庚子命樞密五百修
築白河隄 元史順帝本紀

元順帝至正十一年六月發軍一千從直沽至通州疏
浚河道 元史順帝本紀 是年崔敬遷同知大都路總管府事直沽

河淤數年中書省委敬浚治之給鈔數萬錠募工萬人
不三月告成咸服其能除刑部侍郎

元史崔敬傳

元順帝至正十三年五月己巳命東安州武清大興宛
平三縣正官添給河防職名從都水監官巡視渾河隄
岸或有損壞即修理之

元史順帝本紀

元順帝至正十四年四月命各衛軍人修白浮甕山等
處隄堰 六月河南府鞏縣大雨伊洛水溢漂沒民居
溺死三百餘人

元史順帝本紀

丁好禮蠡州人除京畿漕運使建議置司於通州重講
究漕運利病著為成法人皆便之除戶部尚書

元史丁好

禮傳

國初都金陵則漕於江其餉遼卒猶漕於海自永樂都
燕後歲漕東南四百萬石由江涉高寶諸湖絕淮入河
經會通河出衛河白河遡大通河以達於京師諸洪泉
壩閘以次修舉至於今纖悉具備故並載焉

大通河即潞河舊為通惠河其源出昌平州白浮村神
山泉過榆河會一畝馬眼諸泉匯為七里樂東貫都城
由大通橋而下至通州高麗莊入白河長一百六十餘
里元初所鑿賜名通惠每十里為一閘蓄水通舟以免
漕運陸輓之勞永樂以來諸閘猶多存者仍設官夫守
視然不以轉漕河流漸淤成化正德間累命疏之功不
果就嘉靖六年遣漕運總兵錦衣衛都指揮及御史會

濬之自大通橋起至通州石壩四十里地勢高下四丈
中間設慶豐等五閘以蓄水每閘各設官吏共編夫一
百八十名每名工食銀八兩造剝船三百隻每隻價銀三十五兩分置各閘責經
紀領之使製布囊盛米雇役遞相轉輸軍民稱便明會典

云水部備考大通河成化十二年始命平江伯陳銳疏通之漕舟會至大通橋
下後射利之徒妄假黑背之說事竟阻壞正德二年復疏之功不就桂文襄公
奏議云成化十二年平江伯陳銳不察其故建言修復憲宗皇帝命戶部左侍
郎翁世資工部左侍郎王詒挑浚仍浚西湖諸泉以益水勢可放運船千餘直
抵大通橋下既而水急岸狹船不可泊未幾即耗船退幾不能全遂不復行正
德七八年亦嘗挑浚竟無成功蓋京師之地西北高峻自大通橋下視通州勢
若建瓴而強爲之未免有害非徒無益而已病逸漫記云白浮泉今入清河一
泓泉在灤山後已塞壅山下玉龍雙龍龍青龍等泉入西湖經高粱橋注皇城濠
一自西流入內一自東會入通惠四里至慶豐慶豐十一里至平津慶豐地形
高平津一文許水陡絕故平津開則慶豐河身立見矣張兆元通惠河考云青
龍閘在都城西北三十里廣源閘在白石閘西二里白石閘在西直門西六里
高粱閘在西直門外往北一里許澄清閘在都城萬寧橋西慶豐閘在大通橋
東五里平津上閘在慶豐閘東十一里平津下閘在上閘東四里普濟閘在平
津下閘東十三里通流閘在通州城內至普濟閘十二里以上諸閘皆通惠河

經行之所止文莊云自通州陸輓至都城僅五十里耳而元人所開之河總長
一百六十四里其間置閘壩凡二十處所費蓋亦不貲今廢墜已久慶豐以東
諸壩雖存然河流淤淺通運頗難且今積水潭即今海子在都城中禁城之北
漕舟既集無停泊之所而又分流入大內然後南出其啓閉蓄洩非外人所得
專者言者往往建請欲復元人舊規似亦便利然以陸輓與河運利害略亦相
當故議復元舊欲於城東鑿潭以容漕舟議通陸運欲開新路以達東縣此其
大略也 桂文襄公奏議云正陽門外東偏有古三里河一道東有南泉寺西
有玉泉菴至今基下俱有泉脈由三里河繞出慈源寺八里莊五箕花園一帶
直抵張家灣煙墩港地勢低下故道俱存冬夏水脈不竭見今天壇北蘆葦園
草場九條巷其地者俱河身也高者即舊馬頭明白易見不假經畫稍加修
治即可復也但附近勢家莊園故成化六年楊茂雖嘗建議議而不敢盡言但請
置壩而已後亦竟沮不行成化十二年亦踏勘而勢家賄通欽天監以爲地居
京師子午方位爲說不知三里河乃在都城吳已實非子午方也今誠按此修
浚則公私大船俱可直抵三里河不但便船剝而已明疏議輯略云成化六年
漕運總兵官都督楊茂上言京城南原有三里河直通張家灣煙郭橋自橋往
西疏浚深闊二十餘里卻將煙郭木橋改作吊橋糧船到彼灣泊可免漂流之
患若將此河浚深直至三里河作平水壩三四截於內置扁
淺剝船令運船由此盤壩以達京師歲可省車脚數百萬

白河南去通州二百里其源出胡地經密雲縣合大通
榆渾諸河凡三百六十里至直沽會衛河入海源遠流

迅河皆溜沙每夏秋暴漲最易衝決每決輒發丁夫修築屢築屢決正統三年命官相視地勢自河西務徑二十里改鑿順下河遂安流每淤淺處設鋪舍置夫甲專管挑浚舟過則招呼使避淺而行自此而南運河淺鋪以次而設

明會典 蒼叢云水部備考密雲運道即白河上流運密雲官軍餉者也嘉靖三十四年自密雲城西楊家莊地方築塞新口疏通舊道令白河與潮河合流至牛關山水勢甚大故通州漕糧得抵密雲城下吳文恪公集云密雲河本白河上流自牛關而下與潮河交會初薊遠總督駐密雲從通州至牛關山以車轉餉勞費特甚嘉靖中總督劉燾發卒浚潮河川水達通州用小舟轉粟直抵密鎮矣

衛河舊名御河源出河南輝縣之蘇門山東北流會淇漳諸水過臨漳分為二其一北出經大名至武邑以入滹沱其一東流經大名東北出臨清至直沽會白河入海長二千餘里今為運河

自臨清至直沽凡五衛十七州縣淺一百五十七處 此河自德州

而下漸與海近河狹地卑易於衝決每決輒發丁夫修治嘉靖十三年議準恩縣東光滄州興濟四處各建減水閘一座以洩漲溢之水

明會典 蒼叢云今水經衛河一名御河漢里蘇門山東流運衛輝府城北一里又東流淇水西北來注之淇水源出彰德府林縣西大號山流運淇縣西北三十里合清水清水源出輝縣西南七十里山陽鎮東南流運獲嘉縣界又東南至淇縣界注於淇淇水又東流入衛衛水又東流過大名府濬縣內黃界漳水入焉漳水之源有二一名濁漳出山西潞州長子縣西五十里發鳩山東北流運潞州城西南二十里過襄垣黎城二縣自林縣西北入彰德府境一名清漳出平定州樂平縣西南二十里少山西南流過和順之西北四十里石炭嶺下流運遼州東七十里又西南入潞州黎城縣界自涉縣西入彰德府境二漳俱東至林縣合流至彰德府為漳河運臨漳入廣平府境歷城安廣平肥鄉曲周入於衛河衛水又東北入東昌府館陶縣西三里至臨清汶水即會通河北流入之過東昌府武城縣界入濟南府境運德州城西北過河間府界去景州城東二十里歷故城吳橋東光縣境下至滄州西流運與濟縣入清縣界合滹沱河滹沱河源出山西繁峙縣東北三十里泰戲山歷代州崞縣忻州定襄五臺孟縣北入真定府平山縣界運靈壽縣至真定府城南運晉州過保定府境東鹿縣南三十里達於深州至阜城縣沙水入焉滹沱河歷河間府獻縣城南易水注之至交河縣與高河合為交河至青縣入於衛衛水又東北過靜海至武清與桑乾河合桑乾河源出大同府馬邑

縣西北十里洪濤山下與金龍池水合東流過渾源州北逕宣府保安州新城西南四十里洋河東南流來注之又東入宛平縣界為盧溝河至看丹口分為二派其一東流出通州高麗莊入白河其一南流逕固安至武清縣小直沽入於衛河衛水又東北入於海

會通河自臨清迤南至濟寧州元初由任城即今濟寧開渠至安民山即安山一百五十里復自安民山之西南開渠由壽張西北至東昌又西北至臨清凡二百五十里引汶絕濟直歸漳衛洪武二十四年河決原武縣黑陽山由舊曹州鄆城縣兩河口漫過安山湖而會通漸淤永樂九年因海運艱阻遣尚書都督等官疏鑿元人故道乃於東平州戴村汶水入海處築一土壩橫亘五里過汶水使西流盡出南旺分流四分往南接濟徐呂六分往北以達臨清自後添設新閘修築舊岸大為漕運之利自臨

清抵徐州七百里間全資汶泗沂沭諸水接運總曰開河舊為關四十有三前元建者二十餘永樂以來先後增建者二十餘而減水通河諸關不與焉兩關之間每存稍淺一處約數丈多不過十餘丈用留洩水令積易盈今建設改革益多見開壩條下 明會典

汶河一出新泰縣宮山之下曰小汶河一出泰安州仙臺嶺一出萊蕪縣原山一出縣寨子村俱至州之靜封鎮合流曰大汶河出徂徠山之陽而小汶來會經寧陽縣北堙城歷汶上東平東阿又東北流入海元於堙城之左築壩過汶入洸南流至濟寧合沂泗二水以達於淮自永樂間築戴村壩汶水盡出南旺於是洸沂泗自會濟而汶不復通洸今沂州亦有汶河一出蒙山東澗谷一出沂水縣南山谷俱入邳州淮河洸河乃汶水之支流出寧陽縣北三十里堙城西南流又循縣南流三

十里會寧陽諸泉又六十里經濟寧城東與泗合出天井開河

明會典

沂河源出曲阜縣尼山西南分流為二一西流至金口壩上即與泗會一南流亦與泗會出塔里河又有出沂水縣艾山者會蒙陰沂水諸泉與沂山之汶合流至邳州入淮

明會典

泗河源出泗水縣陪尾山四泉並發西流至兗州府城東又南流經橫河與沂水合元時於兗州東門外五里金口作壩建閘遏泗之南趨國朝因而修築每夏秋水長則啓開放使南流會沂水由塔里河出師家莊閘冬春水微則閉閘令由黑風口東經兗城入濟又南流會

泲水至濟寧出天井閘

明會典

濟河出王屋山至河南濟源縣二源合流其水或伏或見東出於陶止北又東北會於汶今在汶上縣北一名大清河元人作金口壩傍有河

即黑風口

西通濟流並入會通

河

明會典

沁河出山西沁源縣綿山東谷由太行山麓至河南原武縣黑陽山與河汴合流至徐州入運河以濟徐呂二洪每年水勢淺深尺寸管洪官按季奏報前代嘗引沁以通衛正統以前其支流猶自武陟山原村東北由紅荊口經衛輝凡六十里與衛通天順七年河趨陳潁入淮乃開沁以達徐復引河以合泗而故道始湮

明會典

南陽新河在昭陽湖之東起南陽至留城一百四十一里八十八步嘉靖六年以河決命官開濬垂成而止四十四年復決乃因舊跡疏鑿又起留城至境山濬復舊河五十三里凡役夫九萬一千有奇八閱月而成隆慶元年山水衝決復淤新河之三河口薛河沙河起牛溝會此故名乃經理沙薛上流各開支流築黃家口豸裏溝等壩引薛河由呂孟湖出地浜溝築宋家壩引沙河由尹家湖出鮎魚口築黃甫壩引沙河由滿家湖入南陽湖次年工成又為三河口石壩一座南陽湖石隄三十餘里凡建閘九築壩十三減水閘二十開支河九十六里三年又於昭陽湖以東沙薛二水所從入舊河處開鴻溝廢渠達李

家口回回墓而東出留城閘計六十餘里積水俱有宣洩滕沛利之

明會典

徐州洪在徐州為運河要害亂石峭立凡百餘步故名百步洪成化四年命官鑿石以利舟楫又甃石路長一百三十餘丈以便牽挽二十年置石壩長八十丈遇有損壞管河官隨時修築嘉靖二十年於洪下置石閘一座

明會典

呂梁洪在徐州東南六十里有上下二洪相距七里亦運河要害成化八年命官甃二石隄共長七十餘丈十六年命官築石壩長一百六十五丈復於壩西築隄二十餘丈洪東甃石路四百二十丈遇有損壞管河官隨

時修築嘉靖二十年於洪下置石閘一座

明會典

羊山新河萬曆十一年議準由昭靈祠南黃河出口歷羊山內華山梁山接境山開河置閘以避戚港之溜

明會典

淮安運道自漢以來即有高家堰在淮安之東南永樂間通淮河為運道築隄堰上以防淮水東侵又自府北鑿河蓄諸湖水南接清口凡六十里曰清江浦乃運船由江入淮之道建清江等閘遞互啓閉又築土壩以遏水勢後閘壩禁弛河渠淤塞嘉靖八年疏治復舊隆慶中高家堰廢淮水由黃浦口決入漫衍民田萬曆四年開草灣河渠長六十二里分殺黃河以緩清口之衝七

年復築高堰起新莊至越城長一萬八百七十餘丈堰成淮水復由清口會黃河入海而黃浦不復衝決又以通濟閘逼近淮河舊址塌損改建於甘羅城北仍改濬河口斜向西南使黃水不得直射因廢拆新莊閘又改福興閘於壽州廠適中處所其清江板閘照舊增修又議修復五壩惟信字壩久廢不用禮智二壩加築仍舊車盤船隻仁義二壩與清江閘相鄰恐有衝漫移築天妃閘內八年用石包砌高堰九年又於府城南運河之旁自窯灣楊家澗歷武家墩開新河一道長四十五里曰永濟河因置三閘以備清浦之險十一年建清江浦外河石隄長二里磯嘴七座又建西橋石隄長九十八

文以禦淮黃之衝明會典

揚州高寶運道自清口引淮為清江浦至烏沙河匯管家白馬二湖隄黃浦八淺及寶應縣槐角樓南諸湖相接西抵泗州盱眙縣界皆運道所經湖東有隄長三十餘里洪武九年用輒修高家潭等處成化二十一年造石隄漸修至二十餘里其南高郵邵伯等湖皆有石隄運船觸隄往往敗溺弘治三年命官於高郵河迤東開新河以避其險曰康濟河中為圈田南北置閘以時啓閉兩岸俱甃以石嘉靖五年題準於汜光湖東傍舊隄開新河長三十里遂棄康濟河又自寶應至界首凡有溝可通注於海者造平水閘十座十年又自寶應湖東

築月隄長二十一里萬曆五年淮水由黃浦口決入石隄多壞七年命官修築改建減水閘四座加高石閘九座自是寶應諸湖隄岸相接十二年題準於石隄之東傍隄開新河三十餘里以避槐角樓一帶之險曰弘濟

河明會典

儀真上下江口及瓜州便河皆由江達淮運道襟喉宋時儀真嘗建三閘洪武中即其地築為壩弘治元年始建東關羅泗二閘十二年復於濱江建攔潮閘嘉靖五年題準潮長開閘放船潮退盤壩不許候閘延久萬曆四年於朱輝港鑰匙河清江等處各開河以便停泊瓜洲江口舊建土壩江北糧船空回撤壩以出而江南

重船反令盤壩搬剝艱難風濤守候隆慶六年題準自
時家洲以達花園港開渠六里有奇建瓜洲通江閘二
座自此漕艘始免車盤之苦萬曆四年於瓜洲開港塢
以沽運船

明會典

卷第一百四

行水金鑑

卷第一百五

運河水

元時海道自平江劉家港入海經通州海門縣黃連沙
嘴萬里長灘開洋沿山嶼抵淮安路鹽城縣歷海寧府
東海縣又經密州膠州界放靈山洋投東北行路多淺
沙旬月始抵成山計自上海至直沽楊村馬頭凡一萬
三千三百五十里其後再變自劉家港出楊子江開洋
落潮東北行離萬里長灘至白水綠水經黑水大洋轉
成山西行過劉家島入沙門島放萊州大洋抵界河至
直沽其道差直三變自劉家港入海至崇明三沙放洋
向東行入黑水大洋直取成山轉西至劉家島入沙門

行水金鑑卷一百五
放萊州大洋至直沽如遇風順由浙西至京師不過旬
月而已其道徑便國初海運猶仍元舊自會通河成報
罷嘉靖中尋膠萊故道燒鑿馬家壕十五里達於麻灣
隆慶五年議因其故開新河令江南之糧由淮安至江
浦口歷新壩口馬家壕麻灣口海倉口徑抵直沽天津
止一千六百里半從河行其海行者止由海套不泛海
洋惟馬家壕分水嶺二處開鑿為難遣科官勘報竟以
無源水多沙磧而止

以下皆明會典

湖泉之水導引蓄洩皆以濟漕為運道所關徐沛山東
諸湖在運河東者儲泉以益河之不足曰水櫃在運河
西者分漲以洩河之有餘曰斗門而淮揚諸湖即為運

道其山東新舊各泉可引以濟漕者派分為五入汶者
為分水派入泗沂濟及天井漕河者為天井派入白
馬河及南陽棗林魯橋閘河者為魯橋派入南陽新河
者為新河派即沙河派入邳州河者為邳州派今備載
焉

安山湖在東平州週圍八十三里零一百二十二步舊
有二閘底高於河水不能入湖之下口無閘水不能出
嘉靖六年止於湖中築堤十餘里而湖益狹後乃漸復
焉

南旺湖在濟寧州周圍一百五十餘里漕渠貫其中西
岸為南旺西湖東岸為南旺東湖汶水自東北來界分

東湖爲二二湖之下北爲馬踏湖又北爲伍莊湖南爲蜀山湖又南爲馬場湖各湖通連無間凡與西湖盡處相對者即爲東湖東西湖中爲長堤二西堤設斗門爲減水閘十有八隨時啓閉以濟運河遇有淤淺隨時挑濬每二年一大挑隆慶中開南旺月河二十里有奇以便大挑北至王家窪南出尹家窪稍北里餘各建通河大閘一座

馬場湖週圍四十里舊有堤壞與運河相通河水稍盈即洩入湖每致淺涸嘉靖十四年築堤長六十里內外各植柳以護之更置減水閘五座運河易盈湖水亦有蓄洩

蒲灣泊武家湖在汶上縣

南陽湖在魚臺即獨山坡匯爲湖週圍七十六里引沙河經其中入新河

昭陽大湖長十八里小湖長十三里二湖相連北屬滕南屬沛週圍八十餘里納諸縣之水湖口置石閘放水入薛河由金溝口以達舊運河後以河決棄沽頭於湖東開新河則南陽在東昭陽在西去黃水益遠運河乃安

赤山湖微山湖呂孟湖張莊湖四湖相連長八十里在徐州引薛河出地浜溝入新河

蛤蟆湖長二十里連汪湖長一十五里周湖長二十里

柳湖長一十五里在邳州

落馬湖長六十里茅茨湖長六十里黃墩湖長二十里

侍止湖長三十里倉基湖長三十里埠子湖長八十里

在宿遷縣

大莊湖長十里崔鎮湖長三十里在桃源縣

杜村湖長十里萬家湖長十里在清河縣

管家湖在淮安府城西門外舊有堤永樂十四年命官

於湖中築長堤以便運舟隨時修築

白馬湖長三里汜光湖即寶應湖長三十里界首湖即

津湖長三里在寶應縣新開湖長三十五里在高郵州

邵伯湖長十八里在江都縣諸湖延袤高寶以抵揚州

上下相接 以上諸湖

東平州泉十四 舊九新五 汶上縣泉三 舊二新一 平陰縣泉一 舊

滋陽縣泉八 舊四新四 鄒縣泉十二 舊八新四 曲阜縣泉二十

舊十七新三 泗水縣泉五十三 舊三十三新二十 滕縣泉十八 舊十五新三

嶧縣泉五 舊三新二 寧陽縣泉十二 舊 魚臺縣泉十四 舊五新九

濟寧州泉三 舊 泰安州泉三十八 舊三十新五 新泰縣

泉十四 舊十二新二 肥城縣泉九 舊五新四 萊蕪縣泉十六 舊十一新五

蒙陰縣 舊泉五 沂水縣 舊泉十 以上諸泉詳見濟水茲不復贅

宛平縣 閘五 青龍閘 白石閘 廣源閘 高粱閘 澄

清閘

大興縣 閘三 慶豐閘 平津上下二閘

通州開五普濟開 南普開 土橋開 廣利開 通流

開舊普濟通流俱有上下二開今各廢其一石壩

臨清州開五南板開 新開上開 沙灣減水開 潘官

屯減水開 觀音背減水小開舊有會通臨清二開今廢

清平縣開三戴家灣開 李家口減水開 魏家灣減水

開

堂邑縣開四梁家鄉開 土橋開 土橋進水開 新開

口進水開舊有土城中開二減水開今廢

博平縣開五第一至第五五減水開舊有老堤頭北減水開今廢

聊城縣開十通濟橋開 李海務開 周家店開 龍灣

西柳行二進水開官窯口裴家口方家口李家口耿家

口五減水開

陽穀縣開六七級上下二開 阿城上下二開 荆門上

下二開

寧陽縣開二洸河東西二開嘉靖六年建舊有堽城石壩堽城開今廢

滋陽縣開一金口開 金口石壩成化八年因元舊易為石堰舊有土婁杏林二開今廢

鄒縣舊有港里積水開小開今廢

東阿縣開一通源開

壽張縣開一壩一壩沙灣積水開 師家壩 野豬腦堰

東平州開七壩二壩戴村開舊戴家廟開嘉靖十九年建安山開成化十二年建靳家

口開嘉靖四年建袁家口開 安山湖東西二小開 戴村壩

坎河口堤壩舊有魚營減水開今廢

汶上縣開十開河閘 南旺上下二閘 寺前鋪閘 界

首石口二積水閘舊 焦樂張全劉元彭秀孔家邢家常

家關家李泰田家口十減水閘

鉅野縣開一長溝減水閘嘉靖十年建 蓬子山壩

濟寧州開十天井閘 在城閘 趙村閘 石佛閘 新

店閘 新閘六開俱因元舊 嘉靖間重修 仲家淺閘宣德四年建 師家莊閘 魯

橋閘二開永樂間建 上新閘 中新閘 下新閘三開俱成化十一年建 棗林閘

永樂開建 四里灣減水閘舊有分水閘廣運上下二閘水通上閘耐牢 坡開官村閘吳泰開片玉閘碎玉閘今廢

濟寧衛開四永通減水閘 五里營平水閘 十里鋪平

水閘 安居平水閘

魚臺縣開十六南陽閘宣德二年建 利建閘即宋家口閘 隆慶元年建 新河十四減

水閘嘉靖四十五年建 蘇家壩舊有穀亭八里灣硯瓦溝 陽湖泥河五閘今廢

滕縣開一佃戶屯減水閘 東邵壩 王家口壩 豸裡

壩 宋家壩 黃甫壩以上開壩俱隆慶二年建築

沛縣開七珠梅閘 楊莊閘 夏鎮閘 滿家閘 西柳

莊閘 馬家橋閘 留城閘以上七閘俱隆慶元年以舊河孟陽泊沽頭上中下胡陵城廟道口謝溝七閘改建

沙河壩隆慶元年築 薛河口石壩隆慶二年築 權城壩嘉靖四十五年築 舊有新興閘金溝口

飛雲橋雞鳴臺昭陽湖 中東西六積水閘今廢

徐州開四黃家閘天順三年建 梁境閘即境山舊閘 萬曆二年復 內華閘 古洪閘

二閘萬曆十一年建 徐州洪石壩 呂梁洪石壩舊有徐州洪閘呂梁洪上下二閘今廢

邳州開一是頭灣減水閘萬曆八年建

桃源縣開一馬廠坡減水閘萬曆八年建 崔鎮徐昇季太三義四

減水石壩萬曆七年築遙堤建

清河縣壩一通濟開嘉靖中建萬曆七年改建甘羅城出口之處題准每年六月初旬水漲築壩攔截九月初旬水落開壩行舟

天妃壩萬曆七年建舊有新莊開天妃開萬曆七年俱廢

山陽縣壩七福興開萬曆七年改建壽州廠清江開 板開 龍汪開

永清開 窯灣開三開萬曆十年永濟河建黃浦減水開萬曆二年建方家壩

新建壩 仁義禮智四字壩 高家堰石堤萬曆七年建舊有移風開

輓開新城上下二間及萬曆元年建涇河平河橋二減水開又有清江東西淮安滿浦南鎖五壩信字壩今俱廢

寶應縣壩三弘濟河南北二間 長沙溝減水開 朱馬

灣減水開 劉家堡減水開五開俱萬曆十二年建江橋北等八減水

開嘉靖萬曆年間建舊有七里溝菜橋口魚兒溝三減水開白馬湖七里溝槐角樓滾水壩今俱廢

高郵州壩九康濟河南北二間萬曆四年建城南河堤三減水開

嘉靖中建新中堤四減水開萬曆五年建蛤蜊壩舊有觀橋上下二間車

江都縣壩十一廣惠開 通惠開二開隆慶六年瓜洲建邵伯九減水開

芒稻河減水開萬曆十一年建沙壩裔家馬家渡南潭四平水

開萬曆元年建瓜洲十壩舊十一灣頭滾水壩舊有朝宗上下通江新開大同潘家大橋江口留湖九開及新

廟等十一減水開邵伯小壩揚子橋古壩瓜洲減水碓雷公上下二塘小新塘句城塘今俱廢

儀真縣壩四嚮水開 通濟開 羅泗開一名臨江開攔潮開

一壩至五壩 新壩舊有清江等八開裏河口開及東門新高橋二減水開劉塘茅家山北山陳公四塘蔣家溝張家溝二減

水碓今俱廢

丹徒縣壩一大犢山開萬曆十一年建

丹陽縣壩一黃泥壩開萬曆十一年建以上二開俱為挑復練湖設以上皆明會典

會通河之源以南為逆以北為順南接豐沛北迄天

津凡一千五百餘里而推輓之勞不事焉然河之源
其最微者莫若會通黃水衝之則隨而他奔而漕不
行故壩以障其入源微而支分則其流益少而漕亦
不行故壩以障其出流駛而不積則涸故閉閘以須
其盈盈而啓之以次而進漕乃可通漚溢而不洩必
潰於是有減水閘溢而減河以入湖涸而放湖以入
河於是有水櫃櫃者蓄也湖之別名也而壅水爲埭
謂之堰沙解之處謂之淺淺有鋪鋪有夫以時挑濬
焉

以下皆河程記

由沛縣北九十里入魚臺境爲閘者二曰利建即宋
家口明嘉靖四十五年建月河長七十五丈迤北十

八里曰南陽元至順二年建月河長三十五丈明宣
德七年重修減水閘十四俱明隆慶二年建以洩新
河水入南陽湖者也壩一曰南陽明隆慶元年建淺
鋪二十一湖一曰獨山即南陽湖明隆慶元年北岸
築石堤三十餘里

舊運河在昭陽湖西爲閘者三曰孟陽泊在縣治東
元大德八年建月河長十二丈迤北八里曰八里灣
明宣德八年建月河長二十七丈又北八里曰穀亭
元至順二年建月河長五十八丈積水閘二壩一今
皆廢淺二十一

由魚臺而北九十里達於濟寧其東岸鄒縣境也爲

小閘一明成化十年建淺一曰捲里
由鄒縣而北入濟寧境自州以西則濟寧衛分地也
爲閘十四曰棗林距南陽十二里元延祐五年建月
河長八十丈明正德二年重修迤北六里曰魯橋明
永樂十三年建正德二年重修月河長一千一百六
十五丈在河西岸明隆慶四年改爲正河又北五里
曰師家莊元大德二年建月河長四十丈又北十五
里曰仲家淺明宣德五年建月河長五十一丈明萬
曆十二年重修又北五里曰新閘元至正元年建月
河長五十一丈又北八里曰新店元大德元年建月
河長五十一丈明嘉靖十四年重修又北十八里曰

石佛元延祐六年建掘土中得石佛像十二故名月
河長七十九丈明弘治六年重修又北八里曰趙村
元至正七年建月河長九十八丈明弘治十二年重
修又西北三里曰在城元大德七年建明弘治十二
年重修又西北一里曰天井元至治元年建一云唐
尉遲敬德所剏也其西南曰分水元大德五年建月
河閘三上下二閘俱明天順三年改建曰下新即在
城月河曰中新至上新一里明成化十一年建曰上
新即天井月河減水閘六新店新閘仲家淺各一屬
州五里營十里鋪安居鎮各一屬衛明萬曆十七年
建壩一曰趙村月河石壩明弘治初建淺十七曰硯

瓦溝曰棗林曰魯橋

曰師家莊下曰師家莊上

曰仲家淺曰新閘曰新

店曰花家曰石佛曰楊灣曰趙村曰五里曰十里曰

安居曰永通曰曹井橋湖一曰馬場一名任湖在五

里東周圍四十里上受獨山湖之水

起魚臺至濟寧有舊運道焉有閘四曰廣運上明弘

治四年建曰廣運曰永通下明成化十一年建曰永

通明洪武四年建今俱廢淺二十

由濟寧而北一百里至汶上縣之開河驛其左為鉅

野有閘一曰通濟距天井三十五里明萬曆十六年

建月河長七十二丈壩一曰蓬子山一名彭祖上壩

明成化四年築淺五曰大頭灣曰梁家口曰白嘴兒

曰小長溝曰黃沙

由鉅野而北其莊為嘉祥有減水閘六壩一淺四壩

大長溝曰十字河曰寺前曰孫村

由嘉祥而北為汶上境有閘五曰寺前距通濟三十

五里明正德元年建迤北十五里曰南旺上一名柳

林閘又北九里曰南旺下俱明成化六年建又北十

五里曰開河元至正間建明永樂九年重修月河長

一百二十六丈又北十二里曰袁家口明正德元年

建月河長九十九丈月河閘二在南旺上下明成化

間建減水閘九曰焦樂曰盛進曰張全曰劉元曰孫

強曰彭室曰常家曰關家大曰兼濟壩一曰五里鋪

行水金鑑卷一百五
十
滾水石壩在河西岸明萬曆十七年建淺十四曰南
界首曰石口曰柳隄曰南旺曰鵝河口曰田家口曰
關城曰開河曰劉家口曰袁家口曰關家口曰張八
老口曰步家口曰北界首湖一曰南旺在漕河兩涯
周圍一百八十里中爲二長堤漕渠貫其中明嘉靖
二十二年重修其中畫爲三在漕渠之西者曰西湖
縈迴九十三里明成化四年始砌石隄嘉靖二十二
年重修萬曆十七年加築舊隄一萬二千餘丈添築
東面子隄一千二百餘丈其東曰蜀山湖周圍六十
五里明嘉靖二十年創築東隄萬曆二十五年重修
曰馬踏湖周迴三十四里明萬曆十七年築堤三千

二百丈

由汶上而北至東平七十里有閘三曰靳家口距袁
家口十八里明正德十二年建月河長一百八十四
丈迤北三十里白安山明成化十八年建又北三十
里曰戴家廟明嘉靖十六年建洩水閘一曰金線在
戴家廟北明景泰五年建湖口閘二北曰似蛇溝南
曰八里灣明萬曆二十二年建壩二曰戴家壩至州
六十里明永樂九年建曰坎河口石壩明萬曆十七
年建淺十七曰沙堆曰邢家莊曰蘇家莊曰譚家莊
曰安山上曰安山下曰積水湖曰馮家莊曰劉家莊
曰李家莊曰王仲口曰果家莊曰靳家口曰戴家廟

曰韓家口曰張家口曰劉家口

由東平七十里至陽穀縣之荆門驛其間首入壽張縣境有積水閘一曰沙灣明成化七年建壩一曰師家過黃河水使入通源閘以分沙灣之勢堰一曰野豬腦縈迴三十餘里用以瀦水使不衝決漕河

由壽張而北入東阿縣境有閘一曰通源在張秋城南運河西岸即廣濟渠也明景泰四年徐有貞治沙灣決河先為疏水之渠起張秋金隄通壽張之沙河西南至於竹口又西南至大渚潭乃踰范暨濮而上又西北接河沁之水命曰廣濟渠渠口為通源閘有石隄二道自大感應廟起至沙灣長一百六十大明

天順八年修創自沙灣起至荆門驛長一千九百三丈有五空橋在張秋城南與沙灣相對即減水石壩廣袤各十五丈又於上甃石為五竇以漕渠餘水入之小鹽河明弘治四年建淺八曰挂劍曰新添曰沙灣曰北灣曰安家口曰仲渡口曰南浮橋曰北浮橋由東阿而北入陽穀境有閘六在張秋北十里曰荆門上又北三里曰荆門下又北十里曰阿城上又北三里曰阿城下又北十二里曰七級上又北三里曰七級下皆元時建明永樂間修淺十曰何家口東岸曰何家口西岸曰館驛灣東岸曰館驛灣西岸曰張家口曰秦家口曰劉家口曰義河口曰官窰口曰渡

口
由陽穀九十里至東昌府聊城縣之崇武驛其聊城
縣東岸北至博平縣境西岸北至堂邑縣境有閘四
曰周家店距七級十二里元大德四年建迤北十二
里曰李海務元元貞二年建又北二十里曰通濟橋
又北二十五里曰永通俱明永樂十六年建減水閘
四淺鋪二十三曰北壩口曰徐家口曰柳行口曰房
家口曰呂家灣曰龍灣曰宋家口曰破閘口曰林家
口曰于家口曰周家店曰北壩口曰稍長閘曰柳行
口曰白廟曰雙隄曰裴家口曰方家口曰李家口曰
米家口曰耿家口曰蔡家口曰官窑口

聊城西岸南自龍灣鋪北至西北壩鋪平山東昌二
衛分地也有淺二曰中淺曰小淺此在昔年為二衛分地今則
官夫俱屬平山衛而東昌衛

遂無河道
之責矣

由聊城七十里至清平之清陽驛由博平縣北至清
平縣境有減水閘一淺鋪六曰朱家灣曰老隄頭曰
南減水閘曰袁家灣曰朱家屯曰梭隄
由堂邑縣北至清平縣境有閘二曰梁家鄉距通濟
三十里明宣德四年建迤北十五里曰土橋明成化
七年建減水閘三曰函谷洞曰上橋曰梁家鄉淺七
曰函谷洞曰土橋曰中閘口曰馬家灣曰北梁家鄉
曰新開口曰南梁家鄉

行水金鑑卷一百五
由清平縣北至臨清州六十里有閘一曰戴家灣距
土橋四十八里明成化元年建減水閘二曰魏家灣
曰李家口東岸淺鋪八曰朱家曰張家曰十里井曰
趙官屯曰戴家曰陳官屯曰趙家曰潘家橋西岸淺
鋪六曰張家曰李家曰李官屯曰王官屯曰丁家曰
魏家灣

河自衛輝來者歷館陶縣至臨清與會通河合流而
北其淺鋪十二曰灘尚曰窩兒頭曰遷隄曰秤勾灣
曰小馬頭曰南館陶曰安靖曰黃花臺曰李家曰馬
頭曰馬攔廠曰尖冢

由臨清州東岸北至夏津縣境有閘二曰新開上距

戴家灣三十里迤北五里曰南板俱明永樂十五年
建淺鋪五曰弔馬橋曰房村廠曰上口曰丁家馬頭
曰下杖柳西岸北至清河縣境有淺鋪八曰尖冢曰
白廟曰羅家曰孟家曰趙家曰郭家曰陳家曰王家
南岸西至板閘口有淺鋪六曰潘家屯曰七里墩曰
潘家橋曰新莊曰沙灣曰閘口
由清河縣西岸北至夏津縣境有淺鋪八曰二哥營
曰嚴家曰吳家曰孫家曰葡萄曰草廟曰黃家曰賈
家
由夏津縣北至武城縣境有淺鋪六曰新開口曰草
廟曰郝家曰小口子曰大口子曰橫河

由臨清至武城縣之甲馬營驛為一百四十里其間
仍有一渡口驛亦州境也而武城縣東岸北至恩縣
境有淺鋪十三曰商家曰白龍曰白家曰大龍曰灣
頭曰柳林曰大還曰高家曰陳家曰何家曰半邊店
曰陳家曰方遷西岸北至故城縣境有淺鋪十二曰
劉家曰侯家曰周家曰南調嘴曰北調嘴曰西關曰
小流曰孟家曰王家曰張家曰果子曰絕河
由恩縣東岸北至德州境有淺鋪七曰白馬廟曰高
師姑曰滕家口曰回龍廟曰八里堂曰新開口曰曹
家口而回龍廟之北有丁官屯一鋪德州衛地也有
減水閘一在四女樹

由故城縣西岸北至德州衛境有淺鋪四曰鄭家口
曰范家園曰焦姑寺曰孟家灣
由甲馬營驛一百一十五里北至德州之梁家莊驛
而德州東岸北至德州左衛境有淺鋪三曰新窰口
曰飲牛口曰耿家灣
由德州衛西岸北至德州境有淺鋪一曰南陽務
由德州西岸北至德州左衛境有淺鋪三曰上八里
曰蔡張成曰劉皮口
由德州左衛東西岸俱北至德州衛境有淺鋪四曰
小西門曰鄭家口曰四里屯曰下八里屯
由德州之梁家莊驛歷七十里為安德驛再七十里

為良店驛再七十里為吳橋之連窩驛也而德州衛東岸北至吳橋縣境西岸北至景州境有淺鋪九曰張家灣曰圓窩口曰五里莊曰降民口曰丁官屯曰劉官屯曰四里屯曰八里屯曰高官廠由景州西岸北至吳橋縣境有淺鋪四曰羅家口曰薄皮口曰坡唐口曰狼家口

由吳橋縣東西岸俱北至東光縣境有淺鋪七曰降民屯曰鐵河圈曰朱官屯曰小馬營曰郭家圈曰三里曰王家

由連窩驛而北七十里至交河之新橋驛即今泊頭鎮然東光縣東岸北至南皮縣境有淺鋪四曰下口

曰李家曰任家曰狼拾西岸北至交河縣境有淺鋪五曰古隄曰大龍曰桑園曰油房曰白家而二縣之界有瀋陽衛地焉

其河道之責并河夫俱隸於交河主簿

由南皮縣東岸北至天津右衛境有淺鋪五曰北下口曰白家堰曰雙堂曰三角隄曰馮家口

由泊頭而北走七十里至滄州之甌河驛然其間交河縣西岸北至青縣境有淺鋪五曰李道灣曰丁家口曰大流口曰菱角窩曰白洋橋而其中三十八里屬河間衛

由天津右衛東岸北至滄州境有淺鋪四曰小白洋橋曰大白洋橋曰南楊家口曰北楊家口

由甌河驛七十里至興濟縣之乾寧驛而滄州東岸
北至天津左衛境有淺鋪七曰甌河南口曰王家園
曰寇家園曰回回灣曰紅孩兒口曰華嚴口曰朱家
墳口

由天津左衛東岸北至興濟縣境有淺鋪九曰張家
口曰大掃灣曰高家馬頭曰安都寨曰索家馬頭曰
北橫隄曰南橫隄曰許家淺曰南絕隄

由興濟縣東岸北至天津衛境有淺鋪七曰安都寨
口曰王家曰流洪曰安家曰柳巷口曰李家曰八里
堂

由乾寧驛七十里至青縣之流河驛而青縣西岸北

至靜海縣境有淺鋪六曰甌河曰運坊曰李家曰留
小曰流河曰新莊口而甌河之北運坊之南天津左
衛境也有淺鋪五曰流佛寺曰北絕隄曰管莊口曰
蓮花曰石堂

由天津衛東岸北至靜海縣有淺鋪九曰泊張曰新
莊曰寨里曰東漫撒曰馬濟曰王家曰李家曰呂家
曰蔡家而新莊之北三里霸州分地也有淺鋪蘆家

由靜海縣東岸北至天津右衛境西岸北至武清縣
境有淺鋪八曰釣臺曰雙堂曰在城曰獨流曰沙窩
至靜海之奉新驛又一百里至武清縣之陽青驛是
為天津入於海自此而北復為逆河矣

河程記 此記載在
北河續紀不知何人

